

# *SICO SA MOYA*

## *MWA MWAHA WATENI*



Lumela feela, lumela feela,  
Lika kaufela za konahala, lumela . . .

Mi, cwale ka nzila ye:

Cwale Na lumela, cwale Na lumela,  
Lika kaufela za konahala, cwale Na lumela;  
Cwale Na lumela, cwale Na lumela,  
Lika kaufela za konahala, cwale Na lumela.

Halu yemeni ona cwalo cwale, ka litoho zaluna ze inami.

Mulena, taba ye isike ya ba fela pina, kono ibe butungi luli bwa lipilu zaluna ka kuopela kuli, "Cwale Na lumela!" Balutiwa ne ba bulezi nako yeñwi, kasamulaho Jesu hana sa felize kueza misebezi yemituna, se bali, "Mulena, cwale lwa lumela."

Jesu ali, "Kikuli cwale mwa lumela?"

<sup>2</sup> Se bali, "Lu lumela kuli Wena uziba linto kamukana mi ha U kulutiwa ki mutu." Kacwalo, Ndate, busihu bwa kacenu lu lemuha kuli Wena ha utokwi tuto ya luna, kono luna lutokwa ya Hao. Kacwalo lwa lapela kuli Uka lu luta mwa ku lapelela, mwa ku pilela, ni mwa ku lumelela. Lumeleza cwalo, Mulena, kufitela mwa sebelezo ye busihu bwa kacenu. Haiba kuna ni se lu tokwile, a ku lu fe sona, Mulena. Lwa likupa ka Libizo la Jesu. Amen.

<sup>3</sup> Ni ziba kuli buñata bwa mina tuyemi hape busihu bwa kacenu. Mi, fande, ne ni katani batu bene ba bulela kuli ne ba palelwa kukena mwahali, mi basweli kuteeleza kwa mawailesi abona mwa limota ze shutana. Mi cwale lu ka lika kueza kapili fela mo lu konela busihu bwa kacenu, la Sunda busihu, lu ka neela ku lapelela bakuli, lu ka ba ni mukoloko wa ku lapelela sina mo lu kona kubela ni omuñwi kwanu. Kono lu sweli ku neela sebelezo ye busihu bwa kacenu kwa ku lapelela bakuli.

<sup>4</sup> Mi Ni bata kuli muhuliswe hande mwa . . . ona Litemuso ze Kenile ze, mwa Tumelo, yona Tumelo ya hola ye. Tumelo luli! Ikaba tumelo yetuna hahulu kufita nako ifi kaufela ya kwa mulaho mwa lusika kaufela, kakuli ye kwateni i lukela kuba tumelo ya kuungelwa, ku ngiwa mwa halimu. Mi kacwalo lu bata kuli mu lumele busihu bwa kacenu mwa litaba kaufela ze mu boni, kuutwa, ona Linzwi le mu utwile ha li kutazwa, ona—ona lisupo ni limakazo ze mu boni ha liezahala. Lu bata kuli mu i kungele zona zeo kaufela mwa lipilu zamina, mi mu li lemuhe, kamba sani ikona kuba Mulimu kamba nee.

<sup>5</sup> Kuswana sina Elisha wa kale, ha naize, "Haiba Mulimu ki Mulimu, konakuli mu Mu sebeleze." Mi haiba Jesu ki yena ya mwahala lika kaufela ku Mukreste, konakuli Ni sepa lu lukela kutuhela ku zeñwi kaufela mi lu kumalela Yena. Muhupule, ki Yena wa Mwahali, Yena ki Naleli ya kwa Mutulo, Ki yena wa Mafelelezo, Ki yena Mayemo anosi. Mi haiba ki Yena Naleli ya kwa Mutulo. . . Kuna ni fela taba iliñwi yekona kusupa kwa naleli ya kwa mutulo, yani ki masupeza nzila amina o mu sila ni ona. Mi Masupeza nzila ao Ni lika kuli mu sile ka ona ki Linzwi, mi Linzwi kamita li supanga ku Yena.

<sup>6</sup> Mi lu ikutwa inge kuli lu sweli kufita mwa nako yetuna ya maswenyeho ni miliko, ze komosa za nako yateni ni ñalelwia mwahala linaha, ni mifuta kamukana ya lika ze sweli ku ezahala, mi fokuñwi Ni ipumananga kuli ni kwahezwi sina. . . Kaufela ko Ni talima, kuswana sina fa. . . mwa sisepe sesili fa liwate. Mi Ni filwe tamaiso ya Sisepe. Mi kana lu ka eza cwani? Mi fa kutaha yomuñwi ya apezi kuwani ye sweu kwa toho, una ni sisepe sesituna ka linako ze mwanda kufita saka. Kono luka ba koma, kamukana. "Luna lufita batuli ka Yena." Yena Kapitao, mane ki Kapitao Yomutuna, u sweli kwa mafelelezo a muhala wa sisepe, Uka si hoha si be si yo fita. Lu ka koma kuzibisa zeñwi kaufela za zona.

<sup>7</sup> Cwale, busihu bwa kacenu, kuli lu akufe ni ku mi lukulula kuya ka nako. Lwa itumela ka ku koboca kwa mina ko kutelele, ni zeñwi cwalo, ni ka mo mulukela ku zamaiseza, ni kuipa ko mu lukela kueza. Mi, mwabona, sani si ni eza kuba fo Ni lukela fela kuyema ni kuzwelapili kubulela ni kueza lika kaufela ze Ni kona kuli ni mi tuse. Kono ha Ni li kwanu Ni likanga ku i kataza mwa lika kaufela zeo Ni kona, kufa tuso kwa nako yeo luna ni cwale mo. Konakuli muka nga. . . Haiba mu fa batu zeñata hahulu ka nako iliñwi ha ba na ku li hupula. Mu—mu lukela kunga fela nto iliñwi ni ku iswalisa ka swanelo ku mutu kufitela ha ibona. Mi cwale ha sa bile ka kutiya cwalo mwa pilu ya hae, konakuli uka. . . konakuli kipeto mu lute zeñwi hape. Ki muhato ka muhato halunze luya.

<sup>8</sup> Cwale, mu lapele mi mube baba itiisa, mi mulumele cwale busihu bwa kacenu kwa foliso. Ha ni sepi kuli kuna ni puzo mwa minahano ya mina kuamana ni nako ye lupila ku yona. Ha ni sepi kuli kuna ni puzo ka za kuli Mulimu uinzi mwahala sicaba sa Hae kamba nee. Na lumela kuli mina kaufela mwa lumela cwalo. Mi Na. . . Hakuna ku kakanya mwa munahano waka ka sona. Mi Na—Na—Na ziba sicaba sa ka, balikani baka, ona balikani ba Kreste, bana ba—ba Kreste, balumela cwalo.

<sup>9</sup> Mi si ni fa tabo yetuna fa kubona kuli mwa ziba kuli muna ni Liñusa lelizwa ku Mulimu, mi mwa lifa kwa sicaba ni kubona mo ba alabelwa ku Lona. Mi mu ka talima kwa mulaho ni kubulela kuli, "Na itumela ku Wena, Ndate." Oh, haki tabo ni yeo kubona bana ha ba ca Sinkwa se si lumilwe ku bona! Mwa lemuha kuli

yani neli pono lilimo ze fitile, ona mwa tabernakele mo? Yani ki niti, “Sinkwa sa Bupilo.” Muzwale Neville, wa hupula cwalo, butuna. Nako yetuna!

<sup>10</sup> Cwale halu sikuluheni, haiba mubata ku latelela palo kamba ku iñola, fela... Hani lumeli kuli ikona kuba swanelo kuba ni sebelezo kusina kubala Linzwi la Mulimu ni kubulela fateni litaba nyana, haiba ikaba sebelezo ya kufolisa kamba mufuta kaufela. Luna kaufela lwa utwisisa. Hakuna baeñi mwahala luna, Na sepa. Kono luna kaufela lwa utwisisa seo foliso ili sona. Ha ki sika sa mi ezeza mutu; ki seo Mulimu a mi ezelize kale. Puluso inzzi ka mayemo aswana. Taba inosi fela, ki, kunga batu kuli ba lumele kuli ki Niti. Mi Mulimu wa i luta mwa Linzwi la Hae mi ni ku i paka kuba ba ka Ilumela, kakuli Na bulezi kuli, “Lika kaufela za konahala ku ba balumela.”

<sup>11</sup> Mu li, “Hakuna se sipala ku Mulimu.” Mwa lumela cwalo? Hakuna se sipala ni ku mina, hape. “Kakuli lika kaufela za konahala ku bao,” (Mulimu ki Mutu alimuñwi) “ku bao ba balumela.” Mwabona? Kacwalo hakuna se sipala ku mina, ku mina, haiba fela mukona kulumela.

<sup>12</sup> Cwale mwa Malena Bapili, kauhanyo yabu 17, Ni bata kubala litimana zapili zesupa, haiba Mulena alata.

*Mi Elia wa kwa Tishibe, yana yahile mwa Giliadi,  
abulelela Akabe ali, Ka MULENA Mulimu wa Isilaele ya  
pila, yo Ni yemi fapila hae, hakuna kuba puka kamba  
pula ka mwaha ye, kono haisi ka linzwi la ka.*

*Mi Linzwi la MULENA la taha ku yena, lali,*

*Nanuha mo, uye kwa neku la upa, uye kwa neku la  
upa, mi u yo i pata bukaufi ni kanukana ka Keriti,  
mabapa ni Jordani.*

*Mi ikaba kuli, uka nwanga mwa kanukana; kakuli Ni  
laezi mañwalala kuli aku utele kwani.*

Mulemuhe, “aku utele kwani,” isiñi kwa sibaka sisili. “Kwani!”

*Kacwalo aya a yo eza kuya ka taelo ya MULENA, kamba  
ka linzwi la MULENA: kakuli naile ku yo ina bukaufi ni  
kanukana ka Keriti, mabapa ni Jordani.*

*Mi mañwalala nanza mutiseza buhobe ni nama  
kakusasana, ni buhobe ni nama mwa manzibwana; mi  
na nwa mezi a kanukana.*

*Mi kwatoba kuli hasamulaho wa nako, kanukana kiha  
ka kalelela, kakuli neku sina pula mwa naha.*

<sup>13</sup> Mulena aekeze limbuyoti za Hae kwa kubala kwa Linzwi la Hae. Mi cwale, busihu bwa kacenu, Ni bata kunga tuto kuzwa fani, yebizwa kuli, “Sico sa moyo mwa mwaha Wateni.” Kakusasana cwana ne luna ni—ni tuto fa—fa “Ku ezeza Mulimu

sebelezo, kamba kulika ku Mu ezeza sebelezo kusina kuba... - nihaiba nako, mwaha, sibaka, kamba mutu." Mi cwale ye ki yakuli: *Sico Sa Moya Mwa Mwaha Wateni*.

<sup>14</sup> Mupolofita, yo Elia, luziba zenyinyani fela ka yena. Kono luziba kuli nali mutanga wa Mulimu, mi neli mutanga Mulimu wa hola yani.

<sup>15</sup> Mi Mulimu u itusisize Moya wa Hae onoli ku Elia, mane seli linako zetalu, mi usepisize kutaha linako zepeli zeñwi hape; ha ketalizoho, kupanga muhau. Na I tusisize ona ku Elia; Ne utile ku Elisha mwa likalulo zepeli; noli ku Joani Mukolobezi; mi ulukela kutaha ili fela kuto kenya mwateni Munyaliwa wa Macaba; ni kutaha ni Mushe ku to nga Majuda kwa hae. Yani ki niti. Ki linako ze ketalizoho zeo Mulimu a sepisize kuitusisa Moya wa Elia, mi sa ezize kale mwa linako zetalu.

<sup>16</sup> Cwale, yena mupolofita yomutuna yo, halu zibi kwa zwelela. Lu ziba kuli nali wa kwa Tishibe. Kono mwa natezi . . .

<sup>17</sup> Lu ziba zenyinyani ka bapolofita. Halu zibi ko ne ba zwelezi. Haki hañata . . . Sina, Hakuna ye ni ziba ni yomukana yakile azwa mwa keleke kamba ya nabile ni lusika mwa mulaho wa hae. Neli fela batu baba sina kabubo bene ba sa sabisi, mi, linako zeñata, ne ba si ka ituta. Mi bali kuba ba ñole nihaiba hanyinyani, bona kasibili. Isaya ni Jeremia, sibeli sa bona, ne ba ñozi litaba nyana, kono haili muuna muhulu yo Elia yena na si ka ñola nihaiba iliñwi. Buñata bwa bona ne ba si ka ñola; mwendi ne ba sa koni kuñola. Kono neli baana bene ba pazauhile ku kubauha. Hakuna mutu wa mwa Bibebe ya swana sina bapolofita ba kale bani. Ne ba hapa mibuso, malena, batu, likeleke, ni lika zeñwi kaufela, ni ba yema ka kutiya fa Linzwi la Mulimu, mi Mulimu apaka ku bona kuli ne ba lukile. Ne ba li batu baba pazauhile hahulu ufi ni ufi wa bona.

<sup>18</sup> Mi Elia yo kwateni nali alimuñwi wa bene ba pazauhezi mukwazo mwahala bona kamukana. Nali muuna wa mwa lihalaupa. Na zwile mwa lihalaupa; na pila mwa lihalaupa. Bibebe ibulezi kuli na apalanga za bulizi. Na nani matalo a lingu ana itatezanga, ni kaemba ka mukata, wa kamele kanze ka tatelizwe mwa liteka za hae, lulu . . . mahaha kwa sifateho sa hae, mi Na nahaniseza mwendi nabile muuna ya pazauhile hahulu mwa na bonahalela, mi mutualime ku zona.

<sup>19</sup> Kono nelusika . . . kaufela bona ne ba si ka shwa. Kamukana bona—bona ha ba si ka shwelela. Mwa mazazi a Katengo ka ba Nicene, buñata bwa mina batu baba balile ka za *Katengo ka Keleke Yapili ya ba Nicene*, fani hane ba bata kupanga katengo kuzwa ku yona ni kufelisa likeleke zeñwi kaufela, mi litahe ku iliñwi, hane babile ni Katengo kaba Nicene kani, baana baba buhali sina Elisha ba taha mwateni kuzwa mwa lihalaupa, ne ba pila fela miloho; baana baba tuna baba buhali. Kono haili baituti, baba pahami, mwataswa Constantine, ni babañwi cwalo,

ne ba kuzisize manzwi abona. Kakuli bani, kakuba bapolofita, ne ba zibile kuli bubeke bwa buloto bwa Keleke ya Munyaliwa ne bu wezi mwa mubu, ka kuswana sina bubeke bwa buloto ku Munyali mo ne bu wezi mwa mubu. Mi mwani se buina myaha ye likiti.

<sup>20</sup> Ki kabakaleo ku ñozwi mwa libuka kacenu kuli, “Ukai Mulimu ya kuzize yani ya na yema ni kutalima, kubona bana babanyinyani haba bulaiwa, mi basali ba pazuliwa fahali ka litau, mi ali kuina mwa mbyumbiyulu kusina sa bulela ka sona?” Haba zibi Linzwi. Peu ya buloto yani i lukela kuwela mwa mubu. Kana Mulimu ya lukile ukona kuyema cwani ali kutalima Mwana Hae Tota inza shwa mi ba mu kwelaka mati, ni zeñwi cwalo? Kono kuya ka Linzwi, ku lukela kuba cwalo. Mi cwalo kona mo ku inezi ku to fita ni yona hola ye.

<sup>21</sup> Muuna yo, nali muuna yomutuna. Na nani lusika lwa sibi fapila hae. Akabe nali mulena, ndatahe fapila hae nali ya maswe. Kuzwa ku Solomoni, neli fela mulena ya maswe hasamulaho wa ya maswe. Mi muuna yo, Akabe, ya na busize lilimo ze mashumi amabeli ka zepeli mwa Samaria, neli ya maswe hahulu mwahala bona kaufela. Yena nali wa litaba zenca luli. Na lumela mwa bulapeli, kaniti. Mi nana ni lika kaufela mwa buino bwa zenca za kacenu. Nabile ni bapolofita ba Siheberu baba mianda yemine, kaufela bona ne bakeni likolo hande ni ku lutiwa ka swanelo. Mulimu a mu lumela alimuñwi ya na si ke a li lumela, mi yani neli Elia.

<sup>22</sup> Kono Elia, wa kwa Tishibe, neli muuna wa lihalaupa. Ne si muuna wa litalo le li bunolo; nali muuna ya pazauhile wa maña. Mi zazi leliñwi, kasamulaho Akabe amano eza sibi kuli Mulimu na si ka liyemela ni hanyinyani, Abulela ku Elia mwa lihalaupa. Mi fa ataha mwa mukwakwa o shetumuka kwa Samaria, sina hanibile Ni bulelanga kamita; mwendi mahaha a masweu nali kwa pata ya hae, sitenda inge si benya mwa lizazi, meto a masisani amanyinyani, kwa mulaho kwani ni mulamu mwa lizoho la hae, lumenyo mwa pata ya hae, ayela mulena wa Isilaele, mi ali, “Ha... Kuna nihaiba puka ye ka wa kufitela Ni ibiza.”

<sup>23</sup> Mulimu akulufe baana baba cwalo, mwabona, baana baba ziba se ba eza ka za kuli **KISONA SA BULELA MULENA**.

<sup>24</sup> Cwale, lufumana cwana kuli asika eza kale se, Mulimu na mu bizize. Mulimu na ambozi ku yena mi, kabakaleo, na sa sabi sika kaufela. Na sa sabi liñusa la hae, ne lisike ku ezahala; na zibile kuli lika ezahala! Na zibile kuli neli kuya ka Linzwi la Mulena, mi na zibile kuli nali mupolofita wa Mulimu wa hola yateni. Kabakaleo kamba mulena na ka mu puma toho, ku mu kenya mwa tolongo, kaufela se ne ba ka eza, ne si sika pang'a shutano ku yena; na nani tumo, “**KISONA SA BULELA MULENA**,” ona

fapila pata ya mulena. Ki mutu ya buhali cwani! Kono a si ka eza kale se, na bulezi ka linanga tuna le . . .

<sup>25</sup> Kakuli Mulimu hana ku tuhelela sibi kuya si sa amuheli koto. Ku lukela kuba koto. Bunde bwa mulao ki bufi ha kusina—kusina koto? Kana ki bunde bufi bwa ona, lubulele kuli, “ki kuloba mulao kutukisa malaiti,” mi kusina kunyaziwa kasamulaho wateni, kamba kutokwa koto kasamulaho wateni? Wo kwateni haukoni kuba mulao. Kacwalo kuna ni koto kwa sibi. Mi cwale Mulimu ha panga mulao, mi mulao—mulao wani unyefulwa, konakuli ku lukela kuba koto ya sani.

<sup>26</sup> Mi naha ye nei sinyize milao ya Hae kaufela. Oh, ne ba nani keleke yetuna, neba nani tempele. Neba nani nyangela ya baana baba itutile. Neba nani bapolofita mwa na ha kaufela, neba nani likolo za bona, kuba fetula sina mishini. Mi neba nani bapolofita babañata, neba nani buñata bwa—bwa baprista, neba nani bañoli babañata, mi neba nani bulapeli bo buñata, kono nebali kwahule ni Linzwi la Mulimu. Kacwalo Mulimu abiza muuna wa kwande yana sina nihaiba iliñwi ya titulo za bona ni hanyinyani, mi a mu luma alwezi KISONA SA BULELA MULENA.

<sup>27</sup> Mi mulemuhe ka Mwa babalelela Ba Hae. A sika luma kale mupolofita yo ni liñusa, Na ize, “Elia, shetumuka ubulelele Mulena Akabe litaba ze. Mi cwale, ha se uezize cwalo, uzwe fapila hae kapili ona fani, kakuli Ni ku ezelize sibaka kwa kuya mwa nako ya linanga. Ni ka ku babalela, Elia, haiba uka kutaza fela Linzwi la Ka, eza fela se Ni ku bulelela.”

<sup>28</sup> Cwale Ni ka swanisisa bulumiwa bo butuna bo, busihu bwa kacenu, bwa Elia ni nako ya Elia, ni hola ye luli kuyona cwale. Ni lumela kuli Ki mufuta o zamaeleta. Ni nahana ka linaha . . . haiba Ni . . . luba ni nako ya kukutela kwa mulaho, kono Ni bata kubeya nako yetelele mwa mukoloko wa ku lapelela.

<sup>29</sup> Kacwalo hane lu kaya kwa mulaho ni kubona, Isilaele na ngile Palestine ka mayemo aswana mo ne lu ngezi United States ye. Ne lutile mwa United States mo se lu leleka bene ba pila mwateni, ili bene bali ma Indian, mi se lu luwa naha. Mi ona cwalo ni Isilaele kona mwana ezelize hane batile mwa Palestine, mwatasa tamaiso ya Joshua, mwatasa Mulimu, mi ba leleka bayahi ba yona ni kuba amuha naha.

<sup>30</sup> Mi malena bona bapili neli baana baba mata; Davida, Solomoni, ni baana ba batuna. Batompehi ba luna bapili neli baana ba batuna; Washington, Lincoln, ni babañwi cwalo. Mi mafelelezo batompehi kamba malena bakala kuba baba bola ka nako kaufela, mi mafelelezo ba yo ba ni Akabe yo. Mufuta luli, ka kuswana ni lizazi la luna. Mi sicaba ne si bile hahulu sa bunca kuli neba sa lati kuutwa Linzwi la niti la Mulena.

<sup>31</sup> Mi mwakona ku nahaniseza, fa sicaba sa zenca sina cwalo, ki mutanga Mulimu wa niti ya cwani ya na ka utwahala sina ku

bona. "Kiñi, nali ya pulumuka, na lyangani mwa munahano wa hae. Ne kusike kwa ba sika se si cwalo." Nebali ba bulapeli, ba bulapeli hahulu. Neba nani baana baba sepahala, neba nani batu baba sepahala. Nebali ba bulapeli hahulu.

<sup>32</sup> Kacwalo na zibile kuli neku lukela kuba zetuna kufita za lituto za litumelo fela ze zibahala, ne ku lukela kuba sesituna kufita—kufita liñusa leli bunolo, ne ku lukela kufitelela fela kukutaza Linzwi, ku lemaka lipilu za bona za macwe. Na zibile kuli neku lukela kuba sakuli KISONA SA BULELA MULENA kwa kuluma katulo kwa sicaba sani, kacwalo na zibile kuli nana ni za kuli KISONA SA BULELA MULENA. Mi luli KISONA SA BULELA MULENA. Ku hanyeza Sani, neli katulo. Lwa bona sani ni mwa lizazi la luna, hape. Lu boni cwalo mwa lizazi kaufela. Hakusana ze siyezi kwanda katulo ha mu se mutulile museto wa sishemo.

<sup>33</sup> Cwale, mufuta wani kwani, kuli, Ni ka swanisisa Elia ni keleke kacenu, ona keleke ya kacenu. Kusika taha kale katulo, na amuzezi liñusa le. Elia, na li yemela, ka ku litokomela mwa nama, sico sa hae sa nama, kakuli ne isike ya nela cwale, kuya ka Linzwi la Mulimu, ka lilimo zetalu ni likweli ze silezi, kamba haisi Elia hana ka ibiza. "Nako kaufela yo ka bulela, Elia, kona mo ku ka bela." Kabakaleo aya fa pila mulena, mi ali, "Hakuna kuba nihaiiba puka ye ka wa kufitela Ni ibiza." Wani ki—ki mushimbo tuna, nji cwani? Lani ki liñusa luli!

<sup>34</sup> Mi cwale luka swanisisa sani kwa linanga la moya la kacenu. Cwale, luna kaufela lwa ziba, lwa ziba hande luli, kuli kuna ni linanga la moya le lituna mwa naha kacenu, kubulela ka moya. Mi, mwa ziba, kuli sani ne si bulezwi ki bapolofita, ona fo kusika ba kale Kutaha kwa bubeli kwa Kreste, naize, "Kukataha tala mwa naha, mi haina kuba ya sico fela, kono ikaba ya kuutwa Linzwi la Mulimu." Mi lizazi lani ki cwale, "kuutwa Linzwi la niti la Mulimu." Cwale, se si swanisisa linanga la nama ni la moya.

<sup>35</sup> Sibi ni ku sa lumela, ka bakutazi ba buhata ni ba litaba zenca mwa keleke, ne batisize sibaka se kwa buino bo bu cwalo, kwa katulo yene sa taha. Mi ne ba keluhile kuzwa kwa Linzwi la Mulimu ni mupolofita wa Hae, ku za lituto zenca za bulapeli ka Linzwi.

<sup>36</sup> Mu lemuhe fa, ki ka yona nako yani fo Mulimu atisanga sika sesiñwi. Kakuli, Yena, kamita, hakuna Sa ezanga konji pili Ali patulele kwa sicaba, mi Yena kamita uli patululanga ka batanga ba Hae.

<sup>37</sup> Cwale, kono Elia, ka yona nako ye, nana ni sibaka sa kwa mukunda seo Mulimu na mu lukiselize kuli aye ku sona. Yani kona taba ye lu bata kubona cwale lusika ba kale ni mukoloko wa tapelo. Elia nana ni sibaka sa mukunda sene si lukisizwe ki Mulimu Kasibili. Cwale, keleke ne isika mu lukiseza sona,

mulena na si ka mu lukiseza sona, na si ka ipumanela sona yena muñi, kono Mulimu na lukisize sibaka sa kwa mukunda sa Elia kuli afepiwe nako kaufela mwahala linanga, koo sico sa hae ne si tisiwa ka zazi ni zazi. Na satokwi kubilaela sene si ka ezahala kamuso kamba kubilaela haiba lico ne li ka fela. Mulimu na bulezi kuli, "Ni se ni laezi mañwalala mi aka ku uta." Ki taba kwa bunde cwani, mufuta wa sibaka sa luna sa mukunda ku Kreste.

<sup>38</sup> Foo katengo ka lifasi ni ze ezahala kaufela kacenu, baba bulela kuli, "Mazazi a limakazo a felile." Mata amatuna a Mulimu azusizwe mwa likeleke. Ba bonahala inge kuli, ni hanyinyani, habana lika kwanda "mulangu olila ni ngongi ya mulumo o mutuna." Lu ziba kuli yani ki niti. "Mi ni mufuta fela wa bumulimu, mi ba latula Mata ateni."

<sup>39</sup> Ki taba yeswana fela ni yana ezize Davida, kakusasana cwana, ni likocikala, na zwile mwa Linzwi. Fani Linzwi hane li bonisizwe ni kufiwa ku bona, ne ba sa Li lati; kabakaleo, neba zwile ku Lona.

<sup>40</sup> Sani kona sene ba ezize batu ba mwa mazazi a Elia, kuba kwahule ni Linzwi. Neba hupula kuli ne ba nani Linzwi, kono ne ba sina Lona. Kacwalo mulemuhe cwale mwa . . .

<sup>41</sup> Ka nako ya Na ka fa koto ku ya sa lumeli, Na pangile nzila ya mulumeli. Taba yeswana Wa iezanga kamita. Mwa mazazi ha Na ka sinya lifasi ka mezi, Na pangile nzila ya kusaba ka yona ya Nuwe. Mwa mazazi a Na ka tibisa Egepita, Na pangile nzila ya kusaba ka yona kusila liwate kwa sicaba sa Hae. Kamo Mulimu apangelanga nzila ya Hae! Mi ha kusina nzila, Yena uba ona Nzila yani. Ki yena ona Nzila yani!

<sup>42</sup> Cwale lu lemuha kuli lu katana zeñwi za . . . iliñwi ya lihola zetuna za litaba za kale ku ze kile za zibwa. Ne si ndwa ya litobolo ka lilemano ze benya, ze na ni toho ku zona, kuli lu kone kusaba. Ki likeleke ze lu lukela kusaba. Ki hola ye lupila ku yona kona ye lu lukela ku tokomela.

<sup>43</sup> Cwale mulemuhe, kono Mulimu na pangile nzila ya Elia ya kusaba ka yona. Mi U pangile nzila ya bana ba Hae ba balumela kuli ba sabe ka yona cwale, buhali ni lika ze na ni kutaha.

<sup>44</sup> Kakuli, Mulimu nasike kuba ya sepahala kuli a atule sicaba sani ni ku si lumela koto, ni ku tibisa Sodoma ni Gomora, ni ku tibisa Kapenauma mwahala liwate, ni ku nyaza masika ani, ni Sodoma ni Gomora, mi atuhele luna lu eze ze swana ni kuya mutakafululele ka zona. Luna ni katulo kaniti sina bona hane ba na ni katulo. Cwale lu lemuha kuli za . . .

<sup>45</sup> Mi lika ze hane litile, mikwa ya lizazi la nako yani, Mulimu atisa muuna mwa lizazi lani, kamba azusa muuna, nitaluse, kuli alwane ni ku koma mata, mi ne ba si ke ba teeleza ku zani. Ne ba hupula kuli na lyangani, "Na latehezwi ki ngana ya hae. Nali fela mutu yомуñwi wa sikuba sa kale, sikuba sene si shokomoka

mwa lihalaupa, mufuta wa mutu wa matakanyani.” Kono, niteni, nana ni Linzwi la Mulena.

<sup>46</sup> “Linzwi ha li talusi se Li bulela,” kona mo ba bulelela kacenu. “Oh, kihande, Bibele ki buka ya litaba za kale.” Na sepa mu se muboni baba cwalo, bao cwale baba i papata, kuli, “Eva na si ka apule, na cile...” Neli sikamañi sani? Na lumela... “Neli tolwana ya apulikoti,” kona mo ba bulelela kacenu. “Neli tolwana ya apulikoti.” Mi cwale, bali, “Mushe na si ka fitisa bana mwa Liwate Lelifubelu. Neli sishañata sesituna sa mataka, kuyofita kwa mafelelezo a liwate, mi afita mwa liwate la mataka.” Konakuli kana cwale mezi, m-e-z-i, na yemi cwani sina limota mwa maneku amabeli; neba zamaile fa muba o omile, kanti? Oh, bukuba bo bu cwalo! Kono, mwa bona, ku lukela kuba mufuta ocwalo wa lizazi kwa kutisa buhali bwa Mulimu fa batu. Kona mo ku belanga.

<sup>47</sup> Ba bulela kuli kuna ni lika zeñata hahulu za—za mufuta wo... Neba batu ba keleke haba lumeli mwa limakazo. “Ni ka kufa ma dollar aeza lule,” neba ize, “uni bonise makazo. Uni bonise makazo!” Kihande, neba si ka bona haiba neku na ni lika ze eza teni sauzandi ze ne ka ezwa fapila bona. Kiñi, bona, ne ba si ke ba libona.

Mu li, “Zani ha li konahali.” Oh, batili, haki cwalo.

<sup>48</sup> Elia nako yeñwi nali kwa Dotani, mi mpi ya ma Siria ne itile ku to beya munzi mwahali, kuli ba munge, kakuli ne ba ziba kuli kwani kona—kona ko ne kuna ni mata a naha, neli ku yena muboni yani. Kiñi, mulena... Alimuñwi wa baana na bulelezi mulena wa Siria, kuli, “Kiñi, wa ziba, Elia mupolofita, wa kwa Tishibe, wa bulelengala mulena wa Isilaele so ambolanga mwa mukunda wa musiyo wa hao.”

<sup>49</sup> Ali, “A mu yo nga mucaha yani! Yani ki yena mutangana ya lu paleiswa.” Mi mpi ya ma Siria kaufela ya bandamena mwa sibaka sa Dotani. Kaufela bona neba u potolohile.

<sup>50</sup> Mi Gehazi, yena—yena mutanga wa mupolofita, a yema, mi ki hali, “Oh, muñaka tate, limpi li lu potolohile ku lu beya mwahali kwanu. Lu potolohilwe kwa maneku kaufela.”

<sup>51</sup> Yena ali, “Kiñi, kuna ni babañata babali ni luna kufita babainzi ni bona.” Mwabona?

Mi Gehazi atalima talima, ali, “Hakuna ye ni bona neba alimuñwi.”

<sup>52</sup> Ki hali, “Mulena Mulimu, kwalula meto a mushimani yo.” Mi meto a hae a tutubulwa, mi cwale malundu kaufela natezi fela Mangeloi ni makoloi anali mwa matuko, ili Mata a sa bonahali.

<sup>53</sup> Elia azwela kwateni, mi Bibele ili, “Na ba naile ka bubofu.” Na ile ku bona; neba li libofu ku yena. Azwela kwateni mi ali, “Kana mubata Elia nji?”

Mi ali, “Eeni, lwa mu bata.”

<sup>54</sup> Ali, "Amutahe, ni ka mi bulelela kwa fumaneha," mi aba isa ku yo swalwa, ona kwani kone ku na ni limpi za ya mi ba yo swalwa.

<sup>55</sup> Cwale, Bibebe ibulezi kuli, "Na ba natile ka bubofu." Ani kona mafelelezo. Mi batu ba foufalizwe hahulu mwa moy a kacenu, mane nihaiba Mulena Mulimu atahe mwahala sicaba mi aeze taba yeñwi, ni lika za Na sepisize, niteni habana ku Li bona. Ki libofu za moy a; haba zibi Mulimu, haba zibi Mata a Hae amatuna. Cwale, lu lemuha kuli neba ezize cwalo mwa mazazi a Elia, mi ba sa eza cwalo ni kacenu. Mulimu uba nata ka bubofu. Ba bulela cwana kacenu, kuli, "Hakuna limakazo, hakuna taba ye cwalo, ze kaufela ki maikuto fela."

<sup>56</sup> Mi ne ba bulezi taba yeswana ka Elia, kakuli ha na ngezwi kwa lihalimu mi Elisha anga sibaka sa hae, ali mutangana fela, ibo ana ni sitenda, yo munca, banana ba mu matisa mwa mulaho, mi bali, "Mumbulu wa sitenda, kiñi ha u si ka kambama ni Elia?" Mwabona, mane ne ba si ka lumela Zani nihaiba kwa makalelo, ona sicaba, kasamulaho wa lika zeñata ku ezahala. Mi muuna yomutuna wa Mulimu yo hana sa ngezwi mwa Lihalimu ka koloi ya mulilo, kono batu niteni ne ba si ka Li lumela. Mi kwa fumaneha bana babona baba nyinyani bene ba taha mwa mulaho wa muuna yo ni kubulela kuli, "Mumbulu wa sitenda, kiñi ha u si ka kambama?" Mwabona? Mi cwale mupolofita akuta banana, mi bere ya musali ya ba bulaya kaufela bona babaesa mashumi amane ka bababeli.

<sup>57</sup> Cwale mulemuhe. Kacenu, sina mone ku inezi kwani, ba beya toloko ya bona bañi kwa Linzwi. Cwale, haiba ba bata kueza cwalo, fo he kuitingile ku bona, kono balika ku lu eza kuli lu li lumele. Bibebe ibulezi kuli, "Ona Linzwi la Mulimu le halina toloko ya kwa mukunda." Mulimu wa Itolokelanga Iliyena. Mulimu wa paka Linzwi la Hae, mi yani kona toloko ya Teni. Sina ha Ni bulelanga linako zeñata, Na bulezi kwa simuluhu kuli, "Ha kube liseli," mi kwaba liseli. Sani ha sitokwi ku tolokwa; ne ku ezahalile. Na ize, "Mwalyanjo uka itwala," na itwezi. Na bulezi kuli Uka "sulula kwa Moya wa Hae," Na ezize. Mi Na bulezi kuli, "mwa mazazi a maungulo," ona lika za Na ka eza, mi Uswel i wa lieza! Halitokwi nihaiba ku tolokwa; Mulimu uswel i ku fa toloko ya Hae Tota. Hakuna taba kamba mutu wa sikuba uka bulela sikamañi, sani ha si paleliswi Mulimu ni hanyinyani.

<sup>58</sup> Fani Jesu hanali mwa lifasi, Na bile ni kusa lumela kokutuna kwana lukela kulwana ni kona sina mo lu bezi kacenu, mi mane mwendi ka buñata luli. Kono ne li si ka Mu tuhelisa; Na ile cwalo inza peta ni kueza musebezi wa Hae, mi Mulimu na yemela lika kaufela za Na eza. Na ize, "Ha ni yo Ni nosi. Ndate ni Na lu nto iliñwi; Yena upila ku Na. Ha ki Na ya eza misebezi, ki Ndate ya pila ku Na. Mi haiba ha Niezi misebezi ya Hae, konakuli mu si ke mwa Ni lumela; kono haiba Ni eza misebezi mi niteni ha mu

Ni lumeli, konakuli mulumele misebezi.” Mwabona? Ka manzwi amañwi, bona . . . “Mubale Mañolo,” Na bulez kuli, “kakuli kwani kona ko mu nahana kuli muna ni Bupilo Bobusafeli, ki ka kuziba Mañolo. Mi cwale Mañolo, Ona luli, apaka za Ka.” Amen! Ki pulelo yecwani! “Ki ka ona, ona Mañolo, a mi bulelala Yo nili Yena,” Jesu abulela.

<sup>59</sup> Mi ki Mañolo a mi bulelala hola yelupila ku yona. Mi lika ze mubona ha liezwa, ki Mulimu Kasibili mwahala sicaba sa Hae. Hakuna sesikona kuzusa bafu konji Mulimu. Hakuna sesikona kueza lika Za sweli kueza cwale kono Yena. Kakuli Bibele ibulezi kuli, “Yena kiya swana maabani, kacenu, ni kuyakuile.”

<sup>60</sup> Cwale lubona kuli mikwa ya batu, nako yani, “Oh, mazazi a felile, hakuna taba yakuli limakazo. Batu ba beleka ka maikuto a mubili.”

<sup>61</sup> Muteeleze ku Elia yani, mupolofita, na huwile ku ba nyaza ka lituto za bona za bulapeli. Mulemuhe, mulemuhe, na bulez mane inge kuli nali Mulimu yena Kasibili. Elia na bulez mane inge kuli neli yena Mulimu Kasibili, “Puka haina ku wa kuzwa kwa lihalimu haisi ha Ni ka ibiza.” Amen! Eeni, sha. Mupolofita nabile nako yetelele hahulu fapila Kubateni kwa Mulimu!

<sup>62</sup> Bapolofita ba Testamente ya Kale, kamba nako kaufela, hane ba ka pila mwa Kubateni kwa Mulimu kufitela baba Linzwi, Liñusa la bona liba Linzwi Kasibili. Mi, muhupule, na bulez kuli, “KISONA SA BULELA MULENA.” Mi cwale baana bani hane babanga ni mañusa kuzwa ku Mulimu, mi ba fetuha baba tatelizwe hahulu kuli minahano ya bona luli . . . Neika kona ku Iwanisana ni mihupulo ya bona, neba si ke bakona ku—ku si bona hande. Kono ne ba bulela Linzwi la Mulimu, “KISONA SA BULELA MULENA.”

<sup>63</sup> “Hakuna kuba pula ni hanyinyani haisi ha Ni ka ibiza.” Oh, ki pulelo yecwani! Na bile mwa Kubateni kwa Mulimu mi na pakilwe hande ka swanelo luli. Mi, muhupule, sani hape si latelela Amos 3:7, “Mulena Mulimu hana kueza sika konji pili A patulule kwa batanga ba Hae bona bapolofita.” Ali, “Hakuna kuba pula ni yekana ye ka nela!” Yena pili . . .

<sup>64</sup> Ne ba mu seha, ne ba hupula kuli u lyangani, “Sikuba sani!” Kono, mwabona, nani ni KISONA SA BULELA MULENA kuli ne isike kunela. Mi, Mulimu, a si ka eza kale sani, Na li patululezi ku Elia mutanga Hae. Mi nali ya pakilwe, na supilwe kuba mupolofita, kacwalo sicaba ne si lukela kubaka. Kono, mwa sibaka sani, ne ba mu seha, bali, “Oh, luna ni pula yeñata hahulu! Libulukelo litezi. Linuka za yuboka hande.”

<sup>65</sup> Bibele ibulezi kuli, “Ne kusina mane nihaiba puka ka lilimo zetalu ni likweli ze silezi.” Masa kaufela mezi na kalile, kai ni kai. Yani ne si muuna yani, yani neli Mulimu ya na bulela kufitela ku yena muuna yani. Yani neli “Na” yana li teni. Kamita lwa ziba. Kacwalo ki ha . . .

<sup>66</sup> Lu fumana cwana kuli ha kutaha mutu, ya lumilwe ki Mulimu, ya supilwe ki Mulimu, yana ni KISONA SA BULELA MULENA, liñusa ni mulumiwa ki nto iliñwi mi za swana. Kakuli u lumilwe ku to yemela sakuli KISONA SA BULELA MULENA, Linzwi ka Linzwi, kacwalo yena ni liñusa la hae ki nto yeswana.

<sup>67</sup> Muuna wa kopano mwatasa lituso za litumelo, yena ni keleke ki nto “iliñwi.” Muituti mwatasa lituto za litumelo, ze pangilwe ka kopano yeñwi, yena ni liñusa la hae ki nto iliñwi; keleke ya lituto za litumelo, muituti wa za litumelo. Ki swanelo.

<sup>68</sup> Mi cwale haiba mutu utaha ni zeli KISONA SA BULELA MULENA, yena ni Liñusa ki nto iliñwi. Mi fani Elia hana tile ni sakuli KISONA SA BULELA MULENA, yena ni liñusa la hae ne li bile nto iliñwi. Inge Jesu fela, ha Na tile, Na li yena Linzwi, Muñoli Joani 1. Kacwalo Linzwi la Mulimu ni mulumiwa wa lusika neli fela taba yeswana, ka nako kaufela. Yani ki niti.

<sup>69</sup> Jesu nali Linzwi lene li polofitilwe. Nali sona sene ba bulezzi bapolofita kuli si ka ezahala, “Mwalyanjo uka itwala mi apepa Mwana yoo.” Kwa mulaho kwa simuluhu kafoo, Mulimu na ba bulelezi, kuli, “Peu ya musali ika pyata toho ya noha, mi yona ika luma kwa lisito la hae.” Sipolofita se kaufela ne si filwe. Davida na lilile, bapolofita babañwi kaufela mwahala masika, ba bulezzi ka Yena. Nali ku bonahala kwa Linzwi! Haleluya!

<sup>70</sup> Cwale mwa bona ko Ni lika ku fita? Ni ambozi ku mina patalaza kakusasana cwana. Kana ha mu boni mata a Mulimu ya pila mwa Keleke ye pila, yena Munyaliwa? Bakuli ba foliswa, bafu ba zuha, lihole za zamaya, libofu za bona, Evangeli li zamaya mwa mata a Lona, kakuli Liñusa ni mulumiwa ki nto yeswana. Linzwi li mwa Keleke, ku mutu.

<sup>71</sup> Linzwi la Mulimu ne lili ku Elia hana zamaya kwani ni KISONA SA BULELA MULENA, mi ali, “Ha ina kunela.” Yani ne si Elia; yani neli Mulimu ku Elia.

<sup>72</sup> Se ni bulezzi linako zeñata, sina kalibe wa Sayansi ya Sikreste yana ni bulelezi nako yeñwi. Ni bulezzi linako zeñata ka zona. Kalibe naize, “Bo Branham, mu bulelanga hahulu za Jesu.”

Se nili, “Ni sepa kuli yani kona taba fela inosi ye Ni nani ya ku ikalabela ka yona.”

Mi kalibe ali, “Ulika ku Mu eza kuba wa Bumulimu.”

Se nili, “Nali wa Bumulimu.”

<sup>73</sup> Ali, “Oh, Na li mupolofita, Nali muuna yomunde, kono Na si wa Bumulimu.”

<sup>74</sup> Mi se Nili, “Kihande, ni bonise Liñolo lililiñwi le li bulela kuli Na si cwalo.”

<sup>75</sup> Kalibe ali, “Mwa Buka ya Muñoli Joani, ibulela kuli Na ‘lilile’ fan ha Na ile kwa libita la Lazaro.”

<sup>76</sup> “Kihande,” Se nili, “luli, Na lilile. Nali zepeli ali mwa butu ni mwa Bumulimu. Nali mutu, hana lila; kono Na likela kuba Mulimu kuli azuse mufu.” Luli. Se nili, “Nali mutu, na shwa tala; kono Nali Mulimu ha na fepile babaeza likiti ze ketalizoho, ka tunkwa totubeli ni litapi ze ketalizoho.” Yani ki niti. “Nali mutu, ha na lobezi kwa mulaho wa sisepe; kono neli Mulimu ku Yena ya na konile ku kuzisa mezi.” Kakuli kiñi? Yena ni Liñusa la Hae neli nto iliñwi.

<sup>77</sup> Na ize kuli, “Haili Na ni Ndate lu nto iliñwi. Ndate U pila ku Na.” Na li mutalelela wa toho ya Bumulimu ka mubili.

<sup>78</sup> Na sepa neli taba ye komokisa ka zazi leliñwi, fani hane Ni tisa *Linako Za Likeleke Zesupa*. Ka kukala, Ni—Ni palezwi ku utwisia kuli Jesu na yemi fani ni . . . ni yani ye sweu fa halimwa Hae, ali, “Milili ya Hae neli ye misweu sina boy a bwa ngu.” Ne ni sa utwisisi kuli muuna wa myaha ye seti-sili ya kupepwa abe ni milili ya limbi ye sweu cwalo.

<sup>79</sup> Ne ni bizize muituti yomunde, muituti wa Pentekota, mulikani yomunde hakalo. Kihande, neli Muzwale Jack Moore. U butali, muuna ya talifile. Na ize, “Muzwale Branham, yani neli Jesu ya filwe kanya. Cwalo kona mwa Na bonahalezi kasamulaho Amana ku fiwa kanya.” Batili, Ne ni si ka lumela sani. Batili.

Ne—Ne—Ne niize, “Kihande, Muzwale Moore, ni itumezi.”

<sup>80</sup> Ne ni keni mwa muzuzu kwani mi na ambola ku Mulimu. Ne ni batile mwa buka ya litaluso za manzwi za Hae ku Daniele, kone ibulezi kuli, “Mi a Atelwa ki Mazazi yena ya Na tiloba nu milili ye misweu sina boy a bwa ngu.” Se nili, “Mulena, Hani—Hani—Hani zibi sa kubulela, mi Ni na ni musebezi.” Cwale, sani neli ku si kaba kale—. . . mi muhupule, kusika kwaluha kale Maswayo a Supa, mwendi ki silimo kamba kufitelela, kwa mulaho. Ne ni sweli ku lapela kwani, “Mulena, neli sikamañi sani?”

<sup>81</sup> Mi Na talima, fapila ka, ne ku yemi muuna mi neli muatuli, nana ni milili ye misweu kwa yena. Baatuli ba mazazi a kale ne ba tinanga milili ye misweu kwa litoho ku bonisa kuli neli ba mubuso o mutuna.

<sup>82</sup> Mi cwale hane Ni boni Jesu ni milili ye misweu, Ne niize kuli ipaka fela niti lwa ziba, kuli ki Yena Mata apahami amatuna. Mulimu na pakile taba yeswana fa Lilundu la Kubenya, kuli, “Yo ki Mwana ka ya latwa, mu Mu utwe, ki yena Mata a Matuna!”

<sup>83</sup> Mi kwande kwa mulaho kwani kwa simuluho ya Maswayo a Supa, fani Mangeloi ani a supa ha na tile mwa mufuta wa piramidi ya bupahamo yani, na yemi fani ni ku ni bulelela kuli ni kutele kwantu ku to bulela fa Maswayo a Supa ani, mi Na ka ba ni na, Na ni bonisize seo nali sona, lika ze latehile. Na kamita ne ni hupulanga kuli na swailwe kwa mulaho wa Buka mi ne li taba yeñwi yene si ka ñolwa mwa Buka, kono ne kutilo zibahala kuli Ha koni kueza cwalo. Ha ki litaba ze ñozwi mwa Buka . . . Ki ze

patilwe mwahala Buka. "Kakuli yo kaufela ya ka zwisa Linzwi lililiñwi ku Yona kamba kuekeza linzwi ku Yona . . ." Kacwalo ki kunutu ye bile mwa Buka mwahala masika a supa a likeleke. Yeñwi ni yeñwi ya zona ne itisize ku—ku kunutu, kaufela zeama kolobezo ya mezi ni lika zeñwi ze se lyangani hahulu fa nako yetelele.

<sup>84</sup> Mi cwale sani ha ne si ile mwahali, lipatisiso zetuna za kwa California, ze zwa kwani kwa Mexico, kutaha mwa Tucson, kai ni kai, kwa kunga siswaniso sa Sona. Neli pono ye makaza. Muzwale Fred Sothmann kwani, uinzi kwa mulaho kwani, ni Na ni Muzwale Gene Norman, ne lu yemi ona kwani ne lu liteni ha ne Si nanuha mwa halimu. Ne ba kopile siswaniso, ni teni ha ba zibi sesiñwi ka sona. Kwanu nako yeñwi ye fitile, mutu kaufela na bulela kuli, "Mutalime kwanu. Se si bonahala sina *cwana*, ni mafufa a Mangeloi ani, mwa putanezi mwani."

<sup>85</sup> Zazi leliñwi, ku si fetulela kwa silyo, kutilima, ne kuna ni Jesu Kreste ka kupetahala sina Hofmann mwa kile a Mu swaniseza. Na yemi inze ana ni milili ye misweu kwani, usweli kutilimafafasi fa lifasi, ka ku bonisa kuli Yena ki ya Mata kaufela a Matuna. Mahalimu a si paka, Bibele ya si paka, Liñusa la si paka, ka kuswana fela. Mata a Matuna, inza nani milili ye misweu; mwa bona mulelu wa Hae mwatasi. Buñata bwa mina mu boni siswaniso. Luna ni sona kwa mulaho kwani. Mu si fetulele fela mwa neku la silyo, kwa maneku, mu si talime. Ki Yani fani, ka kupetahala fela sina mo ne ku inezi, haiba ne si swanisizwe ka Yena. Ba sweli ku si talima kuzwa kwa mayemo a fosahalile. Mu lukela ku si talima kuzwelela kwa siyemo sesinde. Mi konji fela Mulena Mulimu ki yena ya kona ku patulula neku le li lukile. Mu si fetulele kwa silyo mi mu si talime. Ki Yani fani, ka kupetahala fela, ne ni nani sona ne si pikicilwe fa halimu fani.

<sup>86</sup> Nako ya pili ye Ni kile na Mu bona, Na bonahala sina *Toho ya . . .* Hofmann. Ne ni si ka bona kale sani. Mi tabernakele ya Billy Sunday, kasamulaho wa lilimo, Ne ni si boni. Ndu yaka ha i sikaba kale isina yeñwi ya maswaniso a cwalo haisali.

<sup>87</sup> Cwale, mwa mbyumbyulu mo, ka kubulela kuli yena Mulimu luli yene Ni boni mwa halimu mwa pono kwande kwani, hane nisali fela mushimani yomunyinyani kwande kwanu koku yemi ndu ya sikolo ye, Na bonahala sina cwalo. Mi kwanu wa Mahalimu, myaha ye seti-sili hasamulaho, li pakiwe, kuli ki niti. Yani kona nzila ya Mwa bonahalela; ha ki taba yeñwi ya kunutu ya mulelo wa mutu yomuñwi.

<sup>88</sup> Sina mwa Vatican, bana ni—ni—ni Kreste ye ba swanisize kwani, ni mulelo o likani o musweu kwa silelu sa Hae, kulikana ni butelele bwa inci ya licika cwalo, o shetumuka kukalela fa halimwa mulomo wa Hae kutaha *cwana*, mi ba biza sani kuli Kreste.

<sup>89</sup> Sani si beya fela mwa munahano wa ka muswanisi wa mu Gerike yene Ni boni nako yeñwi mwa muyaho wa litapelo wa kale, yana bonisa mo Adama Eva ne ba bonahalela; ne ba bonahala sina libatana kamba nto yeñwi. Sani seo munahano wa butu ukona ku nahana ka sika sesiñwi sa moyo. Ni sepa kuli Adama neli yomunde hahulu kwa baana babakile ba pila, mi Eva nali musali ya petehile mwa mikwa kaufela.

<sup>90</sup> Cwale minahano ya batu itateza Likा mwa mihupulo ya bona bañi, mi kipeto Mulimu uluma ni ku patulula Taba ka Mata a Hae. Sani kona luli sene singile sibaka kwanu mwa mazazi a Akabe.

<sup>91</sup> Cwale, lu fumana cwana kuli Elia na konile kubulela cwalo kakuli Liñusa la hola ni Linzwi la Mulimu... Yena mulumiwa, ni Liñusa—lona Liñusa, ni Linzwi, nelili nto yeswana ka kupetahala. Mupolofita, Linzwi, Liñusa; mulumiwa, Liñusa, ni Liñusa, nelili nto ye swana. Jesu naize, “Haiba Ni eza misebezi ye ñozwi ka Na, konakuli mu Ni lumele.” Sani ki sesinde. Muuna kaufela ni liñusa la hae ki nto iliñwi.

<sup>92</sup> Kona libaka leo kacenu ha ba sa lumeli mwa kueza misebezi ya Mulimu, kakuli ha ba amuheli Liñusa la Mulimu. Ha ba lumeli Liñusa.

<sup>93</sup> Kono bani baba lumela hola ya Mulimu ye lupila ku yona, lika ze ki Lico ze patilwe. Munahane fela, Mulimu u Li patile kuli ni ha ba talima Fateni bapalelwa ku Li bona. Ka mukwa o swana fela sina Elia mwana foufalelize mpi ya ma Asiria. Ka mukwa o swana o Mulimu a foufaza ya sa lumeli kwa Lico za niti za mwana, yena mulumeli.

<sup>94</sup> Sene ba biza Nuwe kuli, “sikuba,” ka ku yaha aleka, meto a hae na kwaluhezi kwa Linzwi la Mulimu ni kwa sepiso. Kacwalo ona taba luli yene babiza kuli bukuba, ne i pilisize Nuwe ni lubasi lwa hae. Mwabona, ona taba yeswana luli. Liká ze ba seha batu, kona lika ze lu lapelela. Liká ze ba biza batu kuli “kulyangana,” lu libiza “Butokwa!” Seo lifasi libiza “butokwa,” Mulimu u si biza “bukuba.” Mi seo lifasi libiza “bukuba,” Mulimu u si biza “Butokwa!” Ki mukwa fela wa ku lwanisana mwahala Kuluka ni kufosahala. Jesu Kreste ki ya swana maabani, kacenu, ni kuyakuile.

<sup>95</sup> Muhupule, nakeni mwa sibaka sa hae sa mukunda ka mulelo wa Mulimu, ka pizo ya Mulimu, ni Linzwi la Mulimu. Elia nakeni mwa sibaka sa hae sa mukunda ka kuziba kwa pili kwa Mulimu (mulelo), mi pizo ya bupilo bwa hae, mi ni kuya ka Linzwi. Haiba nji yani ha ki yona nzila yene lukeni ka yona, Hanizibi mo lu ka yo kenela kwani.

<sup>96</sup> Mi a mulemuhe, linanga li si ka kala kale, Elia nakeni mwa sibaka sa mukunda se ku yo pila teni. Ki ona mufuta luli wa katulo ye kala ku nata lifasi, Keleke se i bizelizwe kale kwande, Munyaliwa u sa ketilwe kale, mi ulibezezi fela katulo isika

tateka kale. Unza libelezi, usweli kuca Lico za Mulimu, ku ikola limbuyoti za Mulimu. Mutu kaufela ka maikuto a hae a i ketile uziba kuli lu libile ka swanelo, se luli mwahala hola ya katulo.

<sup>97</sup> Mutualime! Muzwale Banks, buñata bwa mina baana babali mo busihu bwa kacenu, mina ba bane ba yemi kwande kwani fa lilundu kakusasana wani.

<sup>98</sup> Mi Ni bata kubulela ka lilundu lani, ka la Sunda lelitatama kakusasana, haiba Mulena alata. Ni na ni sinulo yetuna, sika se si pahami se Ni sa koni kukuza ka sona ni sa si buleli busihu bwa kacenu. Kono Ni na ni...Mwabona? Mi si tundamezi, ka nako kaufela, nto yeñwi i ezahala kasamulaho wa yeñwi. Mwabona? Haina ku lisela ku ezahala, kakuli KISONA SA BULELA MULENA.

<sup>99</sup> Mutu wa mina kaufela kwanu, ma sauzandi ni ma sauzandi fa tepu, ne ba ni utwile hane ni yemi ni kubulela kuli, "KISONA SA BULELA MULENA, kukaba cwana ni cwana." Mi nihaiba mitende ni mapampili a lipiho ana ni ku lipaka kuba cwalo. Ne ba sa zibi kuli neli li sikamañi, kono ne ba si boni. Ha ba zibi kuli ki sikamañi, kono ne ba si boni, ha si panga Linzwi kuba la niti luli.

<sup>100</sup> Ne lu yemi kwanu fa nuka, kuli Lingeloi la Mulena la taha zazi lani, myaha ye seti-sili, kamba 1933 neli yona, ku shetumuka fasasi ni ku to bulela lika za Na ezize. Ku zwela kwande, ni baana babañata ne bayemi fa likamba kwani, bali, "Sani ne si talusa ñi, Billy?"

<sup>101</sup> Se nili, "Sani ne si saka; sani ne li sa mina. Na lumela; mina ha mu lumeli." Mi na zwela fela pili ku itamaela.

<sup>102</sup> Mi mukutazi sali ku na, ki hali, "Utalusa kuli wena, ni tuto ya sitopa sa bu-sebene, uka ya mwa lifasi kaufela ku yo lapelela babusisi ni baokameli ni malena ni babañwi? Mi, oh," bali, "uitohohe Zona!"

<sup>103</sup> Ne ni sa koni ku libala Zona, Ne sili fa pilu yaka. Cwale kwanu, myaha ye seti-sili kasamulaho, lika kaufela za Na bulezi li ezahalile ka kupetahala ka nzila ya Na li bulezi kuli Uka lieza. Ki Mulimu mi hakoni kupalelwa. Yena kamita wa bulukanga Linzwi la Hae. Yena... Musike mwa be mu Li kakanya.

<sup>104</sup> Cwale, mulemuhe, na ile ka mulelo wa Mulimu (ku lemuhiwa), kwa pili kwa pizo ya Mulimu, mi Linzwi la Mulimu, mi ki hakena linanga li si ka kala kale.

Cwale, luziba kuli katulo ifa kaufi ni ku nata.

<sup>105</sup> Ninze ni yemi fa lilundu zazi lani, Muzwale Banks Wood na yemi fani, ne lu sweli ku kambama lilundu. Mwendu Ni libulele hape, kuli liyahe tumelo ya mina kwa mukoloko wa litapelo wo ka ba teni mwa mizuzu yetatama ye lishumi, ye lishumi ni ketalizoho. Ne ni sweli fela ku zamaya kwa pata a Muzwale Banks. Yena na sweli...Na sepa na siile Kezeli Ruby

inge a kula. Mi yena na sweli kutaha mwa mulaho wa ka, Ne ni lemuhile sifateho sa hae, ha si fubela. Ne ni talimile kwa mulaho. Ne ni hupula kuli mwendi lilundu ne li ka mu tatafalela kuli a kambame, kacwalo se Ni ya fela ka kuiketa. Mwahala mahalaupa ani, ku pahama malundu ona *cwalo*, ona kwani kone ku bonahalezi Mangeloi a Mulena. Ne lu sweli kuya cwalo kwa neku lani, kone A bonahalezi likweli ze nyinyani ku sikaba kale sani.

<sup>106</sup> Mi hane Ni ya fahalimwa lilundu, Moya wa Mulimu . . . Hane Ni sikuluhile, kutalima fa halimwa lilundu, Ali, “Nopa licwe leo, mi u mu bulelele kuli, ‘KISONA SA BULELA MULENA, uka bona Kanya ya Mulimu mwa lihola nyana ze tatama.’”

<sup>107</sup> Ne ni nopile fela licwe, mi ali, “Muzwale Banks, Hani zibi kuli kiñi,” na li yumbela mwa halimu, mi se Nili, “KISONA SA BULELA MULENA, uka bona Kanya ya Mulimu.”

Ki hali, “Sani ne si talusa Ruby?”

<sup>108</sup> Se nili, “Batili, Hanisepi kuli ne si na ni sa kueza ka wena, Banks kamba Ruby, yomuñwi wa mina. Ni sepa fela kuli ne Si bulela kuli, ‘KISONA SA BULELA MULENA, sesiñwi si ka ezahala.’”

<sup>109</sup> Mi kakusasana o tatama hane lu yemi kwani, buñata bwa baana, Hanizibi kuli ki babakai babali mo cwale, neku na ni ba twelufu kamba fotini, ba fikitini ba luna ne luli kwani. Hañihañi fela, mukutazi ataha ku na mi ali, “Muzwale Branham,” ki hali, “libizo laka ki na mukete *Wa kuli-kuli*.” Ali, “Nenili alimuñwi wa batusi ba hao mwa California.”

<sup>110</sup> Se nili, “Ni tabile fa ku kopana ni wena, muñaka.” Douglas McHughes. Ki hali, “Ni . . .” Se nili, “Ni tabile fa ku kopana ni wena.” Lwa swalana mwa mazoho.

<sup>111</sup> Ki hali, “Kihande, cwale, Ni bata ku kubuza puzo.” Ali . . . Roy Roberson, musepahali kwanu; Muzwale Wood, Terry ni Billy, ni, oh, Muzwale McAnally, mi ha Ni sa ziba kaufela bene bali bayemi kwani. Mi Na . . . Na ize, “Ni bata ku kubuza taba yeñwi.” Na ize, “Kana Mulena akile akufa lipono kwani sina cwana?”

<sup>112</sup> Se nili, “Eeni, muzwale, kono Ni tile kwanu ka mukwa wa ku to ikatulusa nyana ku zona, ku to pumula.”

Mi se Ni talima kwa ni kwa *cwalo*, mi Ne ni boni dokota yomukima inza mu talima, ali, “Muluti McHughes, buino bwa kukula liito bo bu ka bulaya liito la hao. Ni ku alafile fa lilimo zepeli, mi hakuna ze Ni kona kueza ka zona.”

Mi ki ha Ni sikuluhela ku yena. Se nili, “Kiñi ha u ni kupu kueza cwalo, dokota wa hao uni bulelezi, ka zazi leliñwi, ‘Butuku bwa liito la hao bo.’” Neli mwahala musihali, mwendi ka i lebene kiloko, mi na tinile magilasi a ku sileleza kwa lizazi. Se nili, “Libaka; lo sa tineli sani kakuli ki lizazi, kakuli ki liito la hao. Na ku bulelezi kuli u ‘ka latehelwa ki liito la hao.’”

Mi akala kulila, ali, "Yani ki niti."

<sup>113</sup> Ne ni fetuhile kutilima kwa ni kwa, ne ni na ni focolo mwa lizoho la ka. (Mi Na talima; Ne ni mu boni inza yemi ali ku ni talima, meto a hae inza benya.) Se nili, "Kono KISONA SA BULELA MULENA, hauna ku latehelwa ki liito lani." Ne ni sweli ku zuma ni yena mwa nako ya litabela yefelile, wa kona kubona hande kufita na ni mutu yomuñwi kaufela mwahala sicaba. Na si ka . . .

<sup>114</sup> Mi ne Ni boni musali muhulu a hoha masokisi a hae ni ku shuña neku la sikoci sa hae. Mi ali, "Mushimani, haiba u bona Muzwale Branham, u mu bulelele kuli a lapelele mautu aka." Mi Ne ni talimile kwani, mi ka bunyinyani . . . ne ku bonahala inge litombo ze melile fa mautu a hae, sibaka kaufela.

<sup>115</sup> Se nili, "Bo maho ki basali babana ni limbi kwa toho. 'Mwana ka,' mwa bona. Ne ba ku bulelezi ba si ka ya kale, ha u ka ni bona, kuli ni lapelele mautu a bona. Bana ni litombo nyana, inge, ze lepelela fa mautu abona kaufela." Na bata ku welela fela.

Ali, "Yani kona niti"

Se nili, "Mu bulelele kuli asike a bilaela. Ku kaba hande."

<sup>116</sup> Ne ni kalile ku zamaya zamaya mwahali. Mi ki ha Ni utwa Linzwi la Mulimu kubulela, lali, "Zwa mwa nzila, kapili."

Roy Roberson ya yemi kwani, kakuziba kuli neli mulwani wa ndwa, Ne ni kambekile lizoho la ka fa liheta la hae, Se nili, "Muzwale Roy, ipate, kapili mo konela!"

Ali, "Ki butata mañi?"

Se nili, "Zwa mwa nzila! Ipate!"

<sup>117</sup> Mi se ni kala fela ku zamaya zamaya, na lula focolo yakafafasi, na sikuluha, na tubula kuwanu yaka. Mi ki yo fa Sa taha, Kanya ku Mulimu inze iwa mwa kakundukundu kene ka pazuzzi siemba sa lilundu sina cwalo, ni ku ketula ni ku nyanganyisa sibaka sina cwalo, ku pumaka macacani fa halimu; fa butelele bo bu likana liñokolwa zetalu kamba zene, ze ketalizoho kufitelela toho yaka. Ku ya mwa halimu cwalo inge siseliso mo si inezi cwalo; Ne si ti lo panca hape. Mi, ona fa se Si taha, halalu.

<sup>118</sup> Mi cwale hane Si ile, ka nako ya bulalu, Muzwale Banks ataha teni, mi ali, "Sani kona so no ambola ka sona?"

Se nili, "Eeni."

Ali, "Neli sikamañi?"

<sup>119</sup> Se nili, "Mulimu wa bonahalanga mwa tukundukundu." Ne ni sa zibi kamba Na bata kuli ni bulelele batu kamba nee.

<sup>120</sup> Mi ki ha Ni ya ku yo lapela nyana. Mi ki Ha ni bulelela kuli Ne ni lukela ku ba bulelela. Se nili, "Ki katulo ye libelezi kutaha kwa Likamba la Wiko." Mu mutualime kacenu! Mu talime s ne si ezahalile lihola nyana kasamulaho wa sani: Alaska ne itibile.

Mi cwale taba yateni isweli kuya mwatasi. Lu kena mwa katulo. Sishemo si hanilwe.

<sup>121</sup> Kono tumbo ibe ku Mulimu, luna ni Sico se si patilwe, Sico sa moyo, kuli lupila ka bunde ni sishemo sa sinulo ya Jesu Kreste mwa mazazi a maungulo a, unza iponahaza Iliyena mwahala sicaba sa Hae. Amen! Ne ba keni mwateri. Elia ne ba keni linanga li si ka kala kale. Mulumbe Mulimu ka kuba teni katulo isika kala kale. Cwale seli nako ya kuzwa ni kukena mwahali, kuzwa mwa likopano zani ni kukena ku Kreste, kututa ni kukena mokuñwi kwa balumeli kaufela ba niti.

<sup>122</sup> Mi ki ha bizwa, mi aina fani. Muhupule, na si ka zwa fa kanukana kani kufitela Mulimu hana mu bizize.

<sup>123</sup> Mi kasamulaho wa linanga limana kufela, A mu biza kuzwa kwani, kuya kwa ndu ya mbelwa. Mulemuhe, Abiza mbelwa yo. Mi mbelwa yo na si ka ikeza siango ni baba sa lumeli; kunga nombolo ya sibatana mwa nako ya linanga. Kacwalo ki Ha mubiza . . . kubiza Elia kuli a fepe mbelwa yoo. Neba nana ni fela kankwa kaka likani, nto iliñwi fela yana sepile. Mi Elia ali, "Aku fe na, pili. Kakuli, KISONA SA BULELA MULENA, silibelo sani hasina ku fukuzeha kamba tubana ku kala oli, kufitela lizazi leo Mulena Mulimu ha ka luma pula mwa lifasi." Kubeya Mulimu kwa pili, Linzwi la Hae pili!

<sup>124</sup> Mulemuhe, nekuna ni bupi mwa silibelo. Nako kaufela ya na ilo tatuba mwa bupi, ne ku na ni bupi mwa silibelo. Ne ku na ni oli mwa tubana, nako kaufela ya na yo talimanga mwateri. Kiñi? Bupi bu yemela Kreste mwa nubu ya sico. Litoze ne li na ni ku beiwa fela hande, kuli kaufela zona li lubiwe hande. Toze kaufela ya sico se ka kuswana fela, ku bonisa kuli Yena wa swana maabani, kacenu, ni kuyakuile. Lani neli Linzwi, ona Sinkwa sa Bupilo kulatelela liñusa, kupaka Linzwi.

<sup>125</sup> Kona mo ku inezi kacenu, balikani. Kona mo ku inezi kacenu, ona Sinkwa sa Bupilo sene ba cile bana ku sona, si latelela Liñusa la Mulimu, kuli ba kulisye ka nako ya linanga. Kucwani ha Na ka yema mwahala luna kacenu? Kucwani haiba Na ka yema mwahala luna ona fa? Na ka peta ni kueza hande ka swanelo sina ha Na ezize mwa mazazi ha Nali mwa nama fa lifasi fa. Munyaliwa ki siemba sa Muuna hae, Keleke ki nto yeswana sina Kreste. "Misebezi ye Ni eza ni mina mu ka ieza." Mi ki Linzwi le li petile lika. Na lu bulelezi kuli lika za Na ezize ni luna lu ka li eza hape.

<sup>126</sup> Lu lemuha fa hape, haiba Linzwi li ina ku luna mi litile ku luna, sina mo ne Li ezelize Elia mwa lizazi lani, Li ka eza lika zeswana ze ne li ezize, uka fepiwa ka Lika za kunutu za Mulimu ze patilwe kwa lifasi. Oh! Hape, lipanga Liñusa ni mulumiwa kuba alimuñwi. Sico sa moyo si lukile, mi Ki nako yateni cwale. Mi mañi ni mañi wa mina wa kona kuba ni Sico se haiba mwa Si tabela, haiba mwa itakaleza ku keluha kwa kusa lumela kaufela

kwa hola ye, haiba mu itukisize kutaha ni kukena ku Kreste, mukene mwa sepiso ya Hae.

Mi muhupule lisepiso za Hae, mwa Malaki 4, Luka 17:30, hape ku Muñoli Joani 14:12, ni Mañolo cwalo amañwi amañata, a kubulela, Joele 2:38, ni zeo kaufela za Na ka eza, kamba 2:28, nitaluse, sa Na ka eza mwa mazazi a mafelelezo a. Ni ka mo mupolofita na bulelezi kuli ku kaba Liseli mwa mazazi a maungulo a, mo ne Li ka belekela, sene Li ka eza, Mañolo kaufela asupa kwa mazazi a mafelelezo a. Mi yani ki Kreste! Haiba mwa kona kuipata ku Sani cwale, mwa Sibaka sa mukunda sani, mwakona kuca ni kubona bunde ni sishemo sa Mulimu. Haiba mwa kula, kuna ni foliso kwani.

<sup>127</sup> Mwa hupula Elisha, kasamulaho wa fani, haba ilo fita kwani... Kasamulaho wa nubu ya sico yana nani yani, Kreste, ni kutusa ndu ya mbelwa ka Yona. Mulemuhe hasamulaho wa fani hana bizize mulilo kuzwa kwa lihalimu, ni zeñwi cwalo, mi apaka tumo ya hae, kuba ya Mulimu, ona Moya wa mupolofita.

<sup>128</sup> Mulemuhe mwa lihalupa, fani hana inzi mwatasa kota ya janipa, Lingeloi la taha ni ona mufuta wa sico wani, mi la mu beseza linkwa nyana ni ku mu fepa. Mi kasamulaho nyana A mu lobaza hape, ni ku mu zusa, mi nana ni linkwa zeñata nyana zene besizwe kwani za hae. Mi ki ha zamaya ka mata a linkwa zani ka mazazi a mashumi amane. Kanya ku Mulimu! Yena wa swana maabani, kacenu, ni kuyakuile. Oh, ka mo lu Mu latela, Sico sa moyo ka mwaha wa Sona!

<sup>129</sup> "Ha ki swanelo ku amuha bana buhobe ni ku nepela linja." Kana Jesu na si ka bulela ze swana ku musali wa Mukanana? Na lumezwi ku ba Hae Tota. Yani ki niti. Mi bani kona ba Na tezi... Na si ka ya ku ba Macaba.

<sup>130</sup> Mi cwale kacenu Wa potela ba Macaba mwa nako ya bona, mi ha ki swanelo...

<sup>131</sup> Mu li, "Ki kabakalañi kuli Liñusa ha li sa i mwa libaka zetuna ze, likundi zetuna ze, sina mwahala likopano?"

<sup>132</sup> Ha ki Sico sa bona. Ha ki keleke, ka mo si bizezwa kuli, Sico. Ki Sico sa Munyaliwa. Ki Sico sa moyo mwa nako. Sa kona ku ba kulisa mwa limba. Si na ni mafula hahulu ku bona. Mwabona? Mwabona? Mina—mina—mina hamukoni kueza cwalo. Kono, kwa neku la bana, Ki Sinkwa, Ki Bupilo, Ki Jesu Kreste ya swana maabani, kacenu, ni kuyakuile.

<sup>133</sup> Luka zwa ka ku liyeha haiba ha lu kalisi mukoloko wa litapelo cwale, kacwalo halu inamiseni litoho za luna fa nako nyana.

<sup>134</sup> Mulimu Yomunde, Sico mwa nako ya teni, Sico sa moyo. Sika seo lifasi li sa zibi sesiñwi ka sona. Ka mo luutwela Mulena luna ha bulela busihu bwani, kamba zazi lani kwani kwa Samaria, sibaka se si swana seo Elisha kwana ile ni ku bulela kuli, "Kiñi,

puka haina kuwa haisi ha Ni ka ibiza.” Ona fa ne ku yemi Jesu inza bulelela balutiwa ba Hae.

Bali, “Muluti, kiñi ha U sa ci?”

Yena ali, “Ni na ni Sico se mu sa zibi.”

<sup>135</sup> Luli, Mulena, Sico sa Hae neli kueza tato ya Mulimu, kubona misebezi ya Mulimu ha ipetahala mwa hola ya Hae. Na li teni kwani kuli abone sene si ezahala. “Hani ikezezi sika ili na kwanda kuli pili Ndate a Ni bonise. Seo Ndate a Ni bonisa, kona se Ni eza.”

<sup>136</sup> Mi, Ndate, kona mo ku inezi kacenu. Keleke, mulumeli wa niti, Mubili wa balumeli, una ni kabelo kwa Sico, Sico sa moyo, seo ba sihalihali hakuna se ba ziba ka sona. Lifasi hakuna se li ziba ka Sico se, Ndate. Kono Keleke ya Hao, Sicaba sa Hao, yena Munyaliwa wa Mwana Hao, wa Si lata.

<sup>137</sup> Luna ni kabelo kwa foliso ya mibili ya luna fo baalafi ha ba palezwi. Luna ni kabelo ku be. Ki zeñwi za Lico za Mulimu, za Na file kwa Keleke ya Hae, ni ku lisepisa mwa mazazi a maungulo kwa bana ba Hae baba lumela. Ndate, lutuse kuli lube bana baba lumela, kakuli lika kaufela za konahala kwa balumeli. Lumeleza cwalo, Mulimu Yomunde. Lwa li kupa ka Libizo la Jesu. Amen.

<sup>138</sup> Na lumela Billy nani bulelezi kuli ne ba file makadi a litapelo a likani. Haiba yomuñwi wa kona kuni bulelela taku yeli fa kadi ya tapelo, kona se Ni bata. [Yomuñwi uli, “C.”—Mu.] C, ku lukile, ha lu ngeni C, iliñwi, a mukale, kufitela Ni kala mukoloko wa luna. Mwabona, cwale, bakona kuba kai ni kai. Cwale, haiba mutu kaufela... Kihande, mwabona, Ni ka lika ka mukwa wo. Hanizibi kamba lwa kona kueza kamba nee. Kamba lube fela ni kubiza mukoloko; muine mu kuzize. Hakuna taba ku na. Haiba ne mu ka taha kwa pata kwanu, kamba kuba ni kubiza mukoloko, hakuna taba, ka nzila kaufela. Ni itingile fela fa Moya o Kenile. Ni itingile ku Yena kuli ayemele Linzwi le lona le Ni kutilize.

<sup>139</sup> Muzwale George Wright, Na lumela Cwalo. Kukala hane ni sali mushimani yomunyinyani, ne ni tahanga kwa ndu ya hao lilimo zeñata ze fitile, ku teezeza nyunywani ya kale yani inze i inzi mwa kota, Ni sa lumela ona Liñusa leli swana lani. Na lumela Ki le liswana.

<sup>140</sup> Ku lukile, Na bona basweli ku lukisa za mukoloko wa litapelo. Ku lukile, kadi ya tapelo C, nombolo yapili, ya bubeli, ya bulalu, ya bune, yabu ketalizoho, mutahe pili mi tuyeme ona kwanu. Haiba ha mu koni kuyema, haiba mwa kona ku nanula fela mazoho amina, babañwi ba bona baka taha ba to mi nanula. [Yomuñwi ubulela ni Muzwale Branham—Mu.] Ki sikamañi? Eeh. Uh-huh. Kadi ya tapelo C, yapili, ya bubeli, ya bulalu, ya bune, yabu ketalizoho. Mi cwale mulemuhe, mina baba sina kadi ya tapelo...

<sup>141</sup> Cwale, Hani si kaba kale ni mukoloko wa ku lapelela o cwana fa nako yetelele, telele luli. Ki babakai baba hupula tumo yaka hane lu yahile Tabernakele kwanu? Kuli, “Ueze musebezi wa mubuleli.” Ne ni si ka bulela kuli Ne ni li mubuleli. Na ize, “Ueze musebezi wa mubuleli,” mwabona, “kakuli nako ika taha fo li ka cincezwa zani.” Hola yani ya taha. Ku lukile. Cwale, ku se, Yena . . .

<sup>142</sup> Hamukoni ku kopanya bulumiwa bo bubeli kamba bo bulalu bo bu shutana, kulisa ni ku hasanya evangeli, ka nako yeswana. Haukonni kuba—kuba mupolofita ni kuba mulisana, ka nako yeswana, mwabona, kakuli muna ni misebezi ye shutana, bulumiwa bo bu shutana.

<sup>143</sup> Kono Mulena na ni file se Ni lukela kueza mwa Liñusa la ka. Kono he Na ize, “Eza musebezi wa mubuleli, u zibahalise ka kutala bulumiwa bwa hao, kakuli nako ya ta ha basike ba katelwa kuutwa Tuto ye pilisa.” Haiba nji zani ha li si ka taha kale cwale! Keleke kaufela ya kopano ini hanile. Ha ba koni ku katelwa Tuto ye pilisa. “Kono ka litakazo za bona bañi ba ka ipumanela baluti ba bona mwateni, mi ba ka sikuluhela kwa matangu. Mi ba ka eza lika zetuna za kusinya sina Jambresi ni Janesi bene ba hanyelize Mushe, kono bukuba bwa bona bu ka zibahala.” Mwabona? Mwabona? Ku lukile, malikanyiso! Mwabona mo Jambresi . . .

<sup>144</sup> Mi, Mulimu mwa Lihalimu wa ziba, sene si tomilwe ona mwani mwa lilulu la Tabernakele lani licwe kuzwa ka 1933, ne ni iñoz fa likepe la Bibebe, li beilwe ona fani. Mu talime mo ba ezelize. Mutualime se sitilo ezahala. Malikanyiso, ona cwalo fela. Nebali, “Mu ba tuhele, bukuba bwa bona bu ka zibahala sina ka mukwa wa Jambresi ni Janise mo ne bu inezi.” Fa luteni mwa lizazi lani.

<sup>145</sup> Neni bona keleke cwale fani hane lu toma licwe la mwa lilulu, batu banze ba yemi fa mahaulo ni kwa matuko, kuyema mwa matuko a limota la tabernakele. Kifo he cwale. Neba ize, hane iyahiwa, batu ba mwa tolopo kwanu, neba ize, “Mwahala nako ya likweli ze silezi . . .” Luna ka dollar iliñwi ni masenti a eite kuli lu yahe tabernakele, buñata bwa batu ba lukisanga limota neba lakaza kuli ikaba sibaka sa bona kwa ku lukiseza limota. Kono isali mulaka wa lingu kwa Lingua za Mulimu.

<sup>146</sup> Iliñwi, zepeli, zetalu, ketalizoho, silezi, supile, eiti, naini, lishumi. C, silezi, supile, eiti, naini, lishumi. Ku lukile.

<sup>147</sup> Cwale, “Na Mulena ni licezi, Ni ka liselaela musihali ni busihu kuli yomuñwi akasuhana a i zusa mwa lizoho la Ka.” Mutualime kwa kangisano! Hakuna kopano ya ku Li yemela. Hakuna likeleke sina Yona mwahala naha kwanu. Hakuna Pentekota mwa naha, hakuna sika sisili sa ku Li tiisa. Mutu kaufela wa Iwanisa kolobezo ya mezi, mutu kaufela wa Iwanisa lika zeñwi ze kaufela. Neba kwa lubasi lwa hesu tota, bo ndate

baba ni pepa luli ne ba ni lelekile kuzwa mwa munyako, Ne ni lwalezi liapalo za ka mwa pepa ye nyinyani ya saka mi se ni ya ku yo pila mwa New Albany. Luli.

Kono mwahala likozi zeñata, maziezi ni maswenyeho,  
Ni se ni keni ku zona;  
Ki muhau o ni fitisize fa,

Ni na ni lilimo ze fifite-sikisi za kupepwa, mi cwanoñu fa Ni lukela kusila nuka.

Muhau u ka ni silisa.

Ha se ni bile kwani myaha ye likiti ze lishumi,  
Kubanya ka butuna sina lizazi;  
Haluna kuba ni mazazi amanyinyani a kuopela  
tumbo ku Mulimu  
Kufita mo ne lu kalezi pili.

Oh, mo Ni latela Jesu! Ki yena lifasi kaufela kuna!

<sup>148</sup> Oh, ku lukile, ki babakai bene Ni... Kikai fo ne Ni siyezi, lishumi? Lwa kona kungela fateni ni babañwi? Ku lukile. Neli sikamañi sani, lishumi, lishumi ka ba ketalizoho? Ku lukile. C, lishumi kuisa lishumi ka ba ketalizoho, kaufela ko mu inzi, haiba mwa kona ku yema ni kukena mwahali. Mu cwani? Huh? Ku lukile. C, fifitini kuisa mashumi amabeli, kanti. Yani ibe C, fifitini kuisa mashumi amabeli. Yani ikaba batu baba lishumi hape. Lwa bona... Mwa bona—mwabona ko ku yemi mukoloko kwani, halu na kuba ni bona ka-ka kutithana. Mi lu ka... Ku lukile.

<sup>149</sup> Cwale munife kutwisiso ya mina ye si ka kauhana; haluna ku liyeha. Kono, cwale, oh, ki hola yecwani, ki nako yecwani! Ni—Ni lakaza kuli mañi ni mañi alate Mulena. Ni—Ni lakaza kuli luna kaufela lutahe fela fa sibaka sa kulemuha butokwa bwa muzuzu wo. Halu likeni cwalo. Munife fela kutwisiso ya mina.

<sup>150</sup> Ki sikamañi—sikamañi se lu lika kueza fa? Lu toma Linzwi la Mulimu mwahala tatubo. Elia na ezize taba yeswana, na ile kwa lilundu kasamulaho wa kuziba kuli na lumilwe ki Mulimu kuli apete sani. Ki hali, "Cwale ha lu boneni yo Mulimu ali yena, lu tuhele kuli Mulimu ya ka alaba ka mulilo ibe yena Mulimu."

<sup>151</sup> Mi bahedeni neba ipazauzi, oh, se bali, "Kihande, luli, batili..." Ba—bahedeni ne ba zibile kuli mulilo no si ke kuwa, kacwalo ne ba huwaka ni kutaza lilata.

<sup>152</sup> Kono Elia na zibile kuli ika nela, kakuli nana ni pono yezwa ku Mulena.

Mu li, "Na nani pono?"

<sup>153</sup> Eeni, sha! Hana bile ni lika kaufela ka swanelo ya zona, na ize, "Mulena, Ni ezize lika kaufela ze ka taelo ya Hao." Mi ni mulilo so kala ku nela. Haiba Linzwi la Mulimu li bulukiwa ka

litaku, konakuli ki musebezi wa Mulimu kuli atokomele ze siyezi za teni. U mi kupa kuli mu li beye fani. Mi mu zibe ka niti kuli mu bichelizwe ku to li lula fani. Mwabona? Mi haiba mu cwalo, Yena uka tokomela ze siyezi za teni.

<sup>154</sup> Cwale, kwanu ku ka ba batu baba ka taha mwa mukoloko wo baba ka lapela... Cwale, kihande, mu se muli bukaufi fela ni limota cwale, ku lukile, kwa mukoloko kuli ukalise. Cwale, pili, mbwesha kokuñwi kwanu mwahala muyaho wo, batu babañwi...

Ki babakai mo baba kula mi hamuna kadi ya tapelo, mu nanule mazoho amina. Mwabona, ki mwa sibaka kaufela. Cwale, mu ziba kuli haiba Mulena luna... Mi Na lumela Uka tabelia, haiba Wa swana maabani, kacenu, ni kuyakuile. Na zamaisize mikoloko ya litapelo. Sicaba ne si taha ku Yena mwa mikoloko ye mituna, nyangela, Na ba sweli, ku ba fuyole. Mi ki Ha yema nako yeñwi ni kubulela kuli, “Ki mañi ya Ni sweli?” Atalima kwa ni kwa, abulelala musali sa na Mu swalezi; mi ali butata bwa hae bwa mali ne bu felile, tumelo ya hae ne i mu folisize.

<sup>155</sup> Kucwani ha na ka sikuluha ni kubulela kuli, “Kihande, Hani zibi, Mulena, Nibile ni se fa nako yetelele”? Ne ku si ke kwa ezahala. Batili, ne ku si ke kwa ezahala. Batili.

<sup>156</sup> Kucwani kambe Na bulelezi musali wa Mukanana, “Bakeñisa linzwi le ubulezi kuli, mwana hao wa musizana, diabulosi u zwile ku yena,” kucwani kambe hana kali, “Kihande, cwale, Mulena, Ne—Ne ni bata Wena kuli eze sika se ka mukwa *wo*”? Yena—yena diabulosi na ka be ainzi ku musizana. Kono na kulubela kufumana mwana hae ka mukwa wa Na bulezi kuli uka mu fumana ka ona.

<sup>157</sup> Cwale, Na lu bulelezi, “Haiba wa kona kulumela! Haiba uka bulela kwa lilundu leo kuli, ‘Shenya uzwe fa,’ mi u sa kakanyi mwa pilu ya hao, kono ulumela kuli so kupile si ka ezahala, u ka ba ni sona. Ha mu lapela, kulumela kuli mu ka si amuhela, si ka fiwa ku mina.” Ki sepiso ye cwani!

<sup>158</sup> Cwale muuna ya kutaza evangeli ye bunolo hakoni kulumela sani ni hanyinyani. Na ka ya kwa sikwalo, kutilima mwahali, kamba kuyema fani, ni kubulela kuli, “Kihande, ki sikwata fela sesiñwi sa bapikuluhi baba kenile,” ni kuikela kusili. Mwabona? Kono ha zibi kuli se ki Sico se si patilwe. Ha zibi kuli ye ki Taba ya kunutu ye patilwe ku yena. Ha li zibi. Ki—ki—ki makeke, muhupulo o mapunu, o nyandile, wa sibofu, mi ha a li zibi. Mwabona? Yani kona taba yemaswe.

<sup>159</sup> O Mulimu, ni shwe pili, kono usike wa ni nga ka mukwa o cwalo. Kambe ne ni ka shwa fela (eeni, sha) kufita kueza cwalo. Na sepa mañi wa luna kaufela na ka ba cwalo, nji cwani? [Puteho ili, “Amen.”—Mu.]

<sup>160</sup> Kono, cwale, Mulimu u lu sejisize lika ze mwa mazazi a mafelelezo aa. Mwa Malaki 4, ibulezi kuli Jesu Kreste uka taha

mi ato likanyisa mutu Iliyena mwa mubili wa butu sina mwa Na ezelize kwa Sodoma. Yani ki niti. Mi na bulezi kuli lifasi likaba mwa buino bwa Sodoma. Mi ali, “Neli ka nako yani, Mwana mutu uka patululwa mwa lizazi lani.” Mwabona, Mutu yo ya na tile mwa mufuta wa muuna, yana li “Elohim,” ka Abrahama, foo mwana hae wa sepiso a sika taha kale. Mutualime sene sili sona, Abrahama nabulezi kuli neli Mulimu. Mi Bibele ibulezi kuli ne ku na ni baana babalalu bene batile ku yena, maluli kwa liapalo za bona, ku zamaya, aina fafasi ni kuca sina mutu. Mi Jesu naize, “Ka yona nako yeo lifasi halika kena mwa buino bwa Sodoma, konakuli Mwana mutu uka i patulula Iliyena hape,” isiñi Mwana Mulimu. Mwana mutu, mwabona, uka i patulula Iliyena.

<sup>161</sup> Cwale mu zamaiseze seo ni sa na bulezi mupolofita wa mafelelezo kuli, “Amubone Ni mi lumela mupolofita Elia, mi uka kutiseza li—li lipilu za bana kukutela ku bondate.” Mwabona? Liñusa la ku batisa kukutela mwa Bibele, mi Mwana mutu uka i patulula Iliyena mwa lizazi lani. Mi ka lizazi lani la ku utwahala kwa lusika lwa keleke ya mafelelezo, lona lingeloi la bu supa, likunutu za Mulimu li lukela ku zibahala mwa lizazi lani. Maswayo a Supa a ka kwalulwa. Likunutu za likeleke ze kaufela ni lika, mo ne li ezahalezi, mi ki sikamañi sene sik- . . . kamo, ne si ezahalezi.

<sup>162</sup> Mwabona, ha ba Li zibi. Jesu naize, “Mina Bafalisi ba libofu!” Ali, “Haiba sibofu si eteleta sibofu sesiñwi, kikuli sibeli sa bona ba si ke bawela mwa musima?” Mwabona, wani kona mulelo sicaba sani ha si sa boni lika Zani.

<sup>163</sup> Kunutu ya Teni, ki kuli, Maswayo ani, yeñwi ni yeñwi ya likeleke zani ne i pangile kopano ni kukena ku yona, mi yani ki iliñwi ya lika likunutu ze fosahalile fapila Mulimu. Kana wa bona, Dokota Lee nji? Mwabona, mutualime. Ku cwalo. Yani kona taba ye lukile fani. Yani ki iliñwi ya likunutu. Ne ba ongaongile mi, mubone, ne ba zwile mwa tato ya Mulimu ka kufelelela. Mi yani ika bonahazwa ngandaleza mwa mazazi a maungulo, mi ika eteleta sicaba, isiñi kwa tuto ya tumelo kamba kopano, kono kukuta kwa Linzwi la niti. Mi Linzwi la niti li ka taha kwa sikkwata sesiñwi sa batu, mi Mwana mutu uka i patulula Iliyena mwahala bona, “kuba ya swana maabani, kacenu, ni kuyakuile.”

<sup>164</sup> Oh, mawi! Oh, Na lata sani. Na lata—Na lata ku bulela ka Yena. Na lata ku—ku Mu eza yomutuna fapila sicaba. Hani lukeli ku Mu eza butuna; Ki yomutuna ni kale. Yena upahami hahulu hamukoni ku fita fa halimwa Hae, u kwatasi hahulu kuli hamukoni kushela kwatasi a Hae, u yambalakaní mwa bukima kuli hamukoni ku Mu potoloha, kono kanti mu na ni sibaka mwa pilu ya mina sa Hae. Kikuli hamuna ku Mu amuhela? Mwa bezi yomunde Mulena luna! Ku lukile.

<sup>165</sup> Cwale ha lubeni ka kukuza, mutu kaufela. Cwale, lu bulezi kale za Zona. Mi cwale taba yateni ki kuli, kana Ki niti nji?

Cwale, mwendi kuna ni baeñi mwahali mo. Na kona kubulela kuli haiba . . . ki mina, haiba Kreste wa swana maabani, kacenu, ni kuyakuile, ki sikamañi sa Na ka eza mwa muzuzu wo? Na ka eza taba yeswana ya Na ezize fani ha Na li fa sapili. Kana ki niti yeo nji? Tumelo ya sicaba ne ika swala sapalo sa Hae, mi Na ka sikuluha. Sina mwa Na ezelize ku musali fa lisima, mi Na ezize cwalo ni kwa libaka zeñwi, mi Na boni milelo ya bona.

Cwale, mu li, “Kana Wa kona ku ni folisa?”

<sup>166</sup> Linzwi la Hae li ezize kale zani. Kono taba yateni kikuli, ki ku itibahaza Iliyena kuli U teni mo.

<sup>167</sup> Cwale, haiba Na bonahalile ku luna mwa mubili wa nama, na bonahala fela inge siswaniso sa Hofmann *Toho ya Kreste fa myaha ye Mashumi Amalalu-ka zetalu*, mi mali inza ngonga kwa lizoho la Hae, ni zeñwi cwalo, mañiba a limapo mubili wa Hae kaufela, Ne ni si ke na si amuhela. Batili, batili. Batili, batili. Mi Ha ka taha, Yena luli, “Liito kaufela li ka Mu bona, lilimi kaufela li ka Mu paka; mi sina lumonyi ha lutaha kuzwa kwa Upa kuya kwa Wiko, kona mo ku ka bela.” Mwabona? Ha lu lumeli mwa lituto ze ni likwata. Lu lumela kuli Mulimu ki Linzwi.

<sup>168</sup> Kono Wa i kenyanga mwa mubili Iliyena, kunga mubili wa mina ni mubili wa ka, ni ku mifa limpo, wa ni fa limpo, mi ni ka zona limpo ze Wa ikeza Iliyena ku zibahala. Sani kona Sico sa mukunda. Hakuna taba ka Mwa kona ku itibahaleza Iliyena, una ni ku Si lumela, ulukela kuba ni mpo ya tumelo, ni wena, kuli u Li lumele. Wa lumela cwalo? [Puteho ili, “Amen.”—Mu.] Mi cwale haiba Uka i patulula Iliyena mwa mukwa wani, kikuli uka Mu lumela? [“Amen.”] Ka lipilu za mina kaufela, mu ka Mu lumela nji? Oh, ha ki bunde ni bo, mu libelele fela ku Yena, ni libelela fela ku bona Sa ka bulela.

<sup>169</sup> Ki yo muuna ya yemi fa. Hani si ka mu bona kale mwa bupilo bwaka, sina mo Ni zibela. U bonahala sina muuna yomunde, ya tiile, ya i ketile, mi yena luli ucwalo, Na—Na—Na ha ni zibi. Kono uyemi fani. Cwale, Na kona ku yo beya mazoho ku muuna yani ni ku mu lapelela, ku mu buza haiba na ka lumela. Na ka yema fa ni ku ni bulelela, kuli, “Ni—Ni—Ni bata kuli u lapelele *Wakuli-ni-kuli*. Mi Nina—Nina kuopa koku ni wezi. Ni na ni kuopa mwa toho, ka kuswalelela. Ni na ni litombo mwa mba,” kamba sesiñwi. Yena—yena, Hani zibi. Na ka bulela yeñwi ya lika ze.

<sup>170</sup> Ne ni kali, “Ku lukile, sha, muzwale. Ni ka kubeya mazoho ni kuku lapelela.” Fo ku kaba fela hande nde. Sani kona se lu ezize luli mwahala lusika kaufela. Ki niti yeo nji?

<sup>171</sup> Kono, muhupule, Jesu naize kuli ku ka shutana ka nako fela ya Kutaha kwa Hae, sina mo ne kubezi mwa mazazi a Sodoma. Mi Muuna yana tile, na fulalezi mukokoto wa Hae kwa tende kone ku inzi Sarah, mi ki Hali, (isiñi “Abrame,” cwale) “Abrahama.”

<sup>172</sup> Mwabona, na li Abrame, maloba nyana fani. Kono na kopani ni pono, mi Mulena a mu bulelela kuli, “Ni ka cinca libizo la hao.”

<sup>173</sup> Mi ki yo fa Mulena, Yena kasibili, mwa mufuta wa mutu, inza ca ni kunwa ni yena. Ali, “Abrahama, uka musala hao, Sarah?” S-a-r...r-a-h; isiñi S-a-r-r-a.

Na ize, “U inzi mwa tende, kwa mulaho wa Hao.”

<sup>174</sup> Ali, “Ni ka ku potela, kuya ka sepiso ya Ka lilimo ze mashumi amabeli ka ze-ketalizoho kwa mulaho.”

<sup>175</sup> Mi Sarah a seha kwa mukunda ku yena. Na ize, “Sarah na sehile mwa tende kwani, kuli, ‘Kana lika ze likona ku ezahala cwani?’” Uh-huh. Kuna ni se si tata ku Mulimu? Mwabona? Hakuna. Batili, sha.

<sup>176</sup> Cwale Na bulezi kuli, Jesu na sepisize kuli, “Yena, Mwana mutu,” yali yena Linzwi, (kikuli mwa lumela cwalo?) “uka taha mwa mazazi a maungulo mi uka i patulula Iliyena mwa nako yeo lifasi ne liswana sina Sodoma ni Gomora.” Mwa lumela kuli ki niti yeo nji?

<sup>177</sup> Lusika ba kale ni tapelo iliñwi, babañwi ba mina kwande kafo mulapele mi mubone haiba nji Mwana mutu usali ya swana maabani, kacenu, ni kuyakuile. Mubuze fela haiba U sali cwalo, muli, “Mulena, muuna yo ha ni zibi, kono Ni ziba kuli Wena u ya swana maabani, kacenu, ni kuyakuile,” mubone haiba Uka mi bulelela cwalo.

Eeni, sha. Cwale nanula toho ya hao fa nako nyana fela.

<sup>178</sup> Si kwa mulaho wa ka. Ki mwana hao. Sa cisa mubili ona fa ki fibele. Ki musizana yomunyinyani. Wena uzwelela kwa buse bwa tolopo. Mwana una ni butata bwa mwa mba. Ubile ni bona. Lumela feela.

<sup>179</sup> Cwale, kana sani kona sa Na bulezi kuli Uka si eza? Nali kuba ni mubone mutu yo mwa bupilo bwaka. Mulimu mwa Lihalimu wa ziba cwalo.

<sup>180</sup> Muuna yo kwanu, u bonahala kutiya ni kuijeta. Kono mwabona muluti wani fa halimwa hae fani? Sani si talusa, kwanda kuli Mulimu a mu tuse, hana kuba mo fa nako yetelele. Una ni kansa. I inzi mwa liswafu la hao.

Cwalo, Mwana mutu uteni fa.

Una ni mutiyo fa pilu ya hae ka mushimani yomunyinyani, ki mwana yomunyinyani. Ki niti yeo nji? Wa lumela kuli Mulimu wa kona ku ni bulelela butata bobuli ni mwana? [Muzwale ubulela kuli, “Na ziba Wa kona.”—Mu.] Wa kona. Una ni mioya ye minsu sina mufuta wa kanono. Kona a sa zo ba ni yeñwi ya zona cwanoñu nyana fa. [“Kakusasana wo.”] Yani ki niti, kakusasana wo. Mi wa lumela kuli uka pila mi uhulise mushimani yani, mi uka ba hande? [“Eeni.”]

<sup>181</sup> U inezi kai Charlie Cox? Ki kai kwa inezi? Charlie, uka kana? Ne ni nahana kuli uteni mo busihu bo. Kwa neku le, Charlie. Gary, u inezi kai? Larry, kikuli uteni mo nji? Mushimani yomunyinyani wa hae nana ni taba yeswana, luli ki taba yeswana. U inezi kai, Larry? Taha kwanu fa muzuzu fela. Kihande, ki wena yo fa. Mushimani yomunyinyani yo kwanu nabile ni taba yeswana. Bo ndatahe ni bo mahe ki balikani baka babande luli. Lilimo ze fitile Nenili kwa, mi mushimani yo na tahelwanga ki mioya, ku unsufala fela ni ku wa. Neli kanono. Ne ni lemuhile cwalo ku mushimani yomunyinyani yani, ki ha ni kupa Mulimu kuli a mufolisi. Ha si kaba kale ni kanono hape. Bani ki bo ndatahe; bo mahe bateni mo kokuñwi; mi ki yo fa mushimani, yena kasibili.

<sup>182</sup> Cwale kana mwa lumela, sha? (Ni itumezi, Larry.) Wa lumela, sha? Mi Mulimu wa Lihalimu a alabe taba yeswana ku wena, mi kuli upile ni kuhulisa mwana. Mulimu aku fuyole.

Halu lapeleni.

<sup>183</sup> Mulimu Yomunde, aku mutuse. Ni lapela kuli sishemo sa Hao ni muhau ube fa halimwa hae mi u mufuyole. Ka Libizo la Jesu.

<sup>184</sup> Kutela kwa Louisiana cwale, u tabile, kulumbwe Mulimu ka yena.

<sup>185</sup> Oh, eehe, na zwa kwa Louisiana, luli neli kona, bukaufi ni Lisa la Charles. Ki niti. Mwabona, Na kona kuswala mihipulo ya hao cwale. Kulumbwe Mulimu!

<sup>186</sup> Kihande, u kupa nto—nto yende, ubata kuba ni mbututu. Ubile kale ni bana, bana bababeli, kono ubata ni yomoñwi. Mi Mulimu wa Lihalimu aku alabe cwalo, kezela ka. Taha kwanu, Ni bata fela kubeya mazoho aka.

<sup>187</sup> Mulimu Yomunde, akufe musali yo takazo ya pilu ya hae, kakuli ki taba ye swanela. Ka Libizo la Jesu. Amen.

Cwale zamaya ube ni mwana.

<sup>188</sup> Mulimu ki Mulimu yomunde. Kana mwa lumela cwalo? [Puteho ili, “Amen.”—Mu.] Wa ziba kaufela ze lutokwa. Wa lufa lika kamukana ze lutokwa haiba lwa li lumela. Na bulezi kuli, “Haiba wa kona ku lumela!”

<sup>189</sup> Ne ni lumelisani mwa lizoho ni wena kokuñwi. Ha ni sa hupula kuli neli kai kwani, kono kokuñwi ne Ni ku sweli mwa lizoho. Hani sa hupula fela hande, kono ne luli fela kwa sibaka sesiñwi, kacenu kokuñwi, kono ha Ni zibi kuli neli kai. Kono kwani ha ki kona, se lutezi ku to ambola kwanu. Utile kwanu ku to ambola, kamba ku to lapela, ubata kuli ni lapelele yomoñwi. Yani ki niti. Ha yo kwanu. Uinzi kwa Georgia, wa kula. Mi ha ki kukula fela, ka mibili, kono wa kula ni ka moyo; ki mwana bo maluma ho. Wa lumela kuli Mulimu uka tokomela zeo kakuli u mu yemezi? Wa lumela? Taha kwanu mi lu lapele hamoho.

<sup>190</sup> Mulimu Yomunde, alaba muuna yo takazo ya pilu ya hae, kuli aye a yo fumana muuna yo ya lilela Mulimu. Ka Libizo la Jesu Na kupa. Amen.

Mulimu aku fuyole. Usike wa kakanya. Ulumele ka pilu ya hao kaufela.

<sup>191</sup> U iutwa cwani? Ne si kuli Ne ni si ka swala lizoho la hao ka nako yani, ha no nanula lizoho la hao, Ne ni sweli kulemuha taba yeñwi. Neli muluti, ki lififi le li unsufezi luli. Lani kona libaka. Na ziba kuli ne Ni sweli lizoho la hao, ne Ni ka fumana cwalo, mwabona. Kono ki kansa. Wa lumela kuli Mulimu wa kona ku ishimbulula? Iinezi fa lizwele la hao, kwa nzohoto. Ubata kukutela kwa Carolina ni ku yo lumbeka Mulena ka kuba hande, nji cwani? Mwabona se Ni talusa? Halu lapeleni.

<sup>192</sup> Mulimu Yomunde, ka Libizo la Jesu Kreste, Yena Ya liteni fa cwale; bana ba ca Sinkwa sa Mulimu, mi mwana yo ni yena aikole tumelo, ona Sinkwa sa Mulimu lona La mufa cwale kwa foliso ya hae. Ha zamaye mi abe hande, ka Libizo la Jesu. Amen.

Mulimu aku fuyole, muzwale. U lumele ka pilu ya hao kaufela.

U ikutwa cwani?

<sup>193</sup> Kana ha ki nako yende ye nji? Ku bonahala fela kuli kuna ni sabo yetuna fa halimwa sicaba. Kamba, wa kona ku utwahala inge, mwa lizebe za ka, inge sika fela se si utwahala, "Whew!" Se si taza lilata, kuli, "Whew," sina cwalo, mwabona. Ki Sinkwa sa banana. Mwabona? Ki za mina. Ki za mina. Ha ki za ka; Ki za mina. Ni itumela hahulu, ka yona nako ye cwale, Hani zibi... . Ni i ketile, kuya ka mo Ni zibela; kono Ki Sinkwa sa ka, nina, ha Ni na ni se ni tokwile. Ki Sinkwa sa mina. Ki susuezo. Ku mina mane baba sa kuli, sitisa fela lipilu zaluna fapila Mulimu.

<sup>194</sup> Wo kona mwaha, sa Na bulezi kuli Uka li eza, "Mi sina mone ku inezi mwa mazazi a Sodoma, kona mo ku ka bela fa kutaha kwa Mwana mutu, foo Mwana mutu ha ka patulula." Mwabona? "Mi, amubone, Ni mi lumela Elia mupolofita ku si ka taha kale lizazi lelituna le li sabisa la Mulena. Uka kutisa lipilu za batu ku bo Ndate." Mwabona? Mwabona?

<sup>195</sup> "Mi cwale baba lukile baka hatikela ba—ba maswe, sina mulola." Ba ka tuka sina ondo, mwabona, lifasi likaba cwalo. Lubona kuli li ka wa kwande kwani. Mi kipeto mulilo wazikinyeho uka hasana mwa lifasi, mi lihalimu lika tuka mulilo.

O Licwe la Myaha, uni utwele butuku cwale, ni kasamulaho.

<sup>196</sup> U ikutwa cwani? Kihande, taba iliñwi, una ni butata bwa sisali, butata bwa sisali. Una ni lika zeñwi. Wa ikalelwa, siyemo seo kuba ya ikalelwa. Kutatafala mwa lika kaufela. Kono una ni takazo, hape, yani ki kuamuhela Moya o Kenile. Yani ki niti. Sani kona seo sili sona. Kana wa lumela kuli uka... . U ipulezi sika kaufela? Wa lumela kuli haiba Ni beya mazoho fa halimwa

hao ni kukupa Mulimu kueza cwalo, Moya o Kenile uka taha? [Kezeli uli, “Eeni.”—Mu.] Wa lumela cwalo? [“Eeni, sha.”] Halu lapeleni.

<sup>197</sup> Mulimu Yomunde, Ni beya mazoho aka ku musali yo, mwa mifuta wa ba apositola, ni kupa kuli a amuhele kolobezo ya Moya o Kenile. Ka Libizo la Jesu Kreste, a I amuhele. Amen.

<sup>198</sup> Usike wa kakanya. Isali ya hao, mwabona. Ki ya hao. Ki Sinkwa sa—sa banana.

<sup>199</sup> No nani maikuto asili ha Ni bulezi cwalo, “butata bwa sisali,” nji ne si cwalo? Kakuli sani kona so no nani, ni wena. Cwale wa lumela kuli uka ba hande cwanoñu? Zamaya, itumele fela ku Mulena.

<sup>200</sup> U ikutwa cwani? Kikuli wa lumela ka pilu ya hao kaufela? Wa lumela kuli uka kona kuca sina mo ne ucelanga linako za kwa mulaho? Ku lukile. Zamaya, mi ubulele kuli, “Ni Itumezi, Mulena. Na ilumela.” Kubateni kwa Mulena.

<sup>201</sup> Wa lumela butata bwa mukokoto bo bu ka ku tuhela mi ukaba hande? Ku lukile. Ikele fela, unzo li, “Ni Itumezi, Mulimu yomunde,” mi Mulimu uka ku alaba.

<sup>202</sup> Wa lumela kuli wa kona kuba hande, Mulena uka ku eza hande; mi hauna kuba ni kuopa mwa lingongo, kuba hande ni kuijeta mwa mubili? Wa lumela cwalo? Zamaya, unzo itumela ku Yena, kuli, “Mulena, Na i amuhela ka pilu yaka kaufela, mi Na ilumela.”

Ki sikamañi seo mu lumela ka Sona mina kaufela kafoo?

<sup>203</sup> Wena yali fa, beya lizoho la hao ku musali ya inzi bukaufi ni wena kafoo, mu bulelele kuli misinga ya hae ye luluhile ni kuopa mwa lingongo ku ka mu siya. Fo ha ka . . . ? . . .

<sup>204</sup> Mulimu aku fuyole. Wa lumela kuli uka ba hande cwale? Zamaya kwa hae mi ube. Mulimu aku fuyole. Ikele mwa nzila ya hao, mi uli, “Ni Itumezi, Mulena Jesu.”

<sup>205</sup> U cwani? [Kezeli uli, “Ku lumbwa Mulena.”—Mu.] Wa lumela kuli butata bwa busali bu ka ku siya, ni wena? [“Na lumela.”] Mi ukaba hande? [“Ni Itumezi, Jesu.”] Zamaya, mi uli, “Ni Itumezi, Mulena.” [“Ni Itumezi, Jesu.”]

<sup>206</sup> U cwani? [Kezeli ubulela kuli, “Ni comohile musifa.”—Mu.] Kiñi, mawi, mawi! [“Totten.”] Na ziba libizo la hao. Ni—Ni na ni banga . . . [“Totten.”] hane Ni sa lisa keleke ya Baptist. [“Totten.”] Totten. [“Della Totten.”] Kezeli Della Totten. U katazwa ki butata bwa mukokoto cwale. [“Eeni.”] U ka ba hande, cwale. Wa lumela kuli Uka ku bisa hande? [“Eeni.”] Wa hupula sene si ezahalile kwani kwa keleke ya Milltown Baptist lilimo ze fitile? [“Eeni, Na hupula sani!”] Yena isali Mulimu ya swana kacenu. [“Oh, kulumbwe Mulimu!”] Mulimu aku fuyole, kezela ka.

George Wright, u kai? Wa hupula? Mawi, kamo ne . . .

Wa lumela, haiba Ne ni ka kubeya mazoho, ka yona tozo ye, wa lumela kuli ukaba hande? Taha kwanu. Ka Libizo la Jesu Kreste hafoliswe. Amen. Ube ni tumelo!

Kihande, kana mwa lumela kamukana mina ka lipilu zamina kaufela? [Puteho ili, "Amen."—Mu.]

<sup>207</sup> Cwale, ka bunde mo si tiseza likupuzo za kale, ka kubona kalibe yani! Hanikoni ku hupula libizo la hae, niteni, kono Ni... [Yomuñwi uli, "Totten."] Totten. Totten, yani ki niti. Oh, eeni, mwana hae wa musizana neli Bertie. Yani ki niti. Yani ki niti luli. Musike mwa nahana kuli Ni lyangani, Ni inzi fela ka mukwa wa kuli, mwa ziba, ki mufuta wa... Hanikoni ku si talusa.

<sup>208</sup> Kono butata bwa mukokoto wa hao bu felile, kalibe. Zamaya, lumba Mulena, mi uli, "Ni Itumezi, Mulena."

<sup>209</sup> Wa lumela kuli butata bwa pilu ya hao bu ka ba hande, ni wena? [Mukuli uli, "Eeni."—Mu.] Ikele fela, unyakalale, ni kubulela kuli, "Ni Itumezi, Mulena Jesu," mi u Si lumele. Ku lukile. Ube ni tumelo cwale. Usike wa bilaela.

<sup>210</sup> Taha, kalibe. Kana wa lumela ka pili ya hao kaufela? Una ni lika zeñata ze fosahalile ni wena. Una ni butata bwa mukokoto, ni wena. Wa lumela kuli Mulimu uka ku eza hande? Ku lukile, i kele fela, unzo nyakalala. Kuli, ki Yena ya kueza kuli uikutwe cwalo. Itumele ku Mulena. Mulimu aku fuyole, kezeli.

<sup>211</sup> Yela, mushimani. [Mushimani uli, "Mulumele!"—Mu.] Kikuli wa lumela kuli Mulimu uka folisa ku ikalelwa kwa mana yani ni ku mu eza hande? Wa lumela cwalo nji? Ku lukile. Yela, mulikani, alubone ni swale lizoho la hao.

<sup>212</sup> Mulimu Yomunde, zusa nto ye maswe ye kuzwa ku mushimani yomunyinyani yo, mi hapile ni kuba hande. Ka Libizo la Jesu. Amen.

<sup>213</sup> Mulimu aku fuyole, muzwale. Wa lumela cwalo, nji cwani? Ukaba hande. Usike wa kakanya ni hanyinyani.

<sup>214</sup> Usali mwanana kuli ube ni butata bwa pilu. Kikuli wa lukela Mulimu uka ku bisa hande? [Mukuli uli, "Eeni, sha."—Mu.] Zamaya, uli, "Na itumela ku Wena, Mulena, ka ku ni folisa."

<sup>215</sup> Wa lumela kuli Mulimu uka folisa butata bwa mwa mba ni ku kueza hande? Zwelapili, u wabelwe, mi uli, "Ni itumezi ku Wena, Mulena."

<sup>216</sup> Yena isali Mulimu, nji Cwani? [Puteho ili, "Amen."—Mu.] Taba fela yo lukela kueza ki kulumela. Nji haki niti yeo? Kana wa lumela ku Mwana mutu mwa mazazi a mafelelezo?

<sup>217</sup> Kuna ni se si ezahalile mo ka mizuzu yelikani yefitile, mi ha Ni koni...kulika kufumana fo ne si inezi. Yomuñwi ubile ni tumelo mi uezize taba yeñwi. Kamba, mwendi Ni ka litalima la Sunda lelitatama, kamba ha Ni kona. Kana mu—mu... Ki sani fani hape. No nanuzi lizoho la hao. Kana wa lumela kuli Mulimu

wa kona ku folisa butata bwa pilu boo, aku eze hande, afolise mwana hao wa musizana kwande kwani ni—ni... Wa lumela cwalo? Ma Neff, wa lumela kuli Mulimu... Leo Neff. Hani ku zibi, kono seo kona soli sona. Una ni butata bwa pilu, mi mwana hao yomunyinyani wa musizana una ni butata bwa lipiyo. Wa lumela kuli uka ba hande? Tumelo ya hao i ku folisize. Ulumele ka pilu ya hao kaufela.

<sup>218</sup> Wena kwa mulaho kafoo mwa lisa, ya yemi ni butata bwa mwa mba, Jesu Kreste wa ku eza hande.

<sup>219</sup> Mwa lumela? [Puteho ili, “Amen.”—Mu.] Yena kiya swana maabani, kacenu, ni kuyakuile. Halu beyeni mazoho aluna ku yomuñwi ni yomuñwi cwale. Oh, munahane ka hola ye lupila ku yona, munahane ka nako. Munahane kuli luinzi mwa Kubateni luli kwa Jesu Kreste, yena Mwana Mulimu. Na sepisize kuli Uka eza se mwa mazazi a maungulo. Ni beile mazoho aka fa litaulo ze.

<sup>220</sup> Mulimu Yomunde, Ni lapela kuli U fuyole litaulo ze kwa foliso ya mibili ya sicaba, ka Libizo la Jesu Kreste.

<sup>221</sup> Cwale, ni mazoho amina abeilwe ku yomuñwi ni yomuñwi, mañi ni mañi wa mina mu lilama za Mubili wa Kreste. Ona Moya o Kenile oswana ono sepisize ku patulula likunutu za lipilu ni kueza lika ze, U inzi ku mina. Mu siemba sa Hae, mi Yena ki siemba sa mina. Cwale, Na bulezzi cwana, “Lisupo ze lika latelela baba lumela.” Bani ki mina. “Haba ka beya mazoho fa bakuli, ba ka foliswa.” Cwale, musike mwa itapelela, mu lapelele yena yo mubeile mazoho, kakuli ni yena wa mi lapelela. Cwale halu lapeleni hamoho, mi kusike kwaba mutu ya fokola mwa muyaho wo. Kiñi ha luka litela nako yetelele hape, muzwale waka ya latwa, kezeli, ki Wo fa, ona Moya o Kenile, Mulimu, ona mo, yona Taba luli ye lu bulezzi ka yona.

<sup>222</sup> Jesu Yomunde, lu lemuha Kubateni kwa Hao. No tisize mbututu yani kwa bupilo ka zazi leliñwi, hasamulaho ha ne i shwile, ka tapelo ya tumelo. Mulimu Yomunde, kuna ni babañata mo bo lu sika fita ku bona, nako ya fela, kono ba kambekile mazoho abona ku yomuñwi ni yomuñwi. Ki balumeli. Luinzi fa pila Pata ya Mulena Jesu Kreste, ya zuhile kwa bafu, ya swana maabani, kacenu, ni kuyakuile.

<sup>223</sup> Satani, u komilwe! Jesu Kreste na ku komile! Na zuhile kwa bafu mi uyemi mwahala luna busihu bwa kacenu, unza paka Liñusa la mazazi a mafelelezo le. Zwa mwahala sicaba se! Ba tuhele, ka Libizo la Jesu Kreste! “Ka Libizo la Ka baka leleka mioya ye lunya,” mi wena u lelekilwe. Ka Libizo la Jesu Kreste, tuhela puteho ye!

<sup>224</sup> Mañi ni mañi wa mina cwale baba amuhezi foliso ya mina, muyeme ka mautu. Mutu kaufela ya amuhela foliso, a mu yeme. Mu nanule mazoho amina cwale ni ku Mu fa milumbeko!

“Cwale ni amuhela foliso yaka,” mubulele cwalo ku Mulimu. Cwale ni amuhela foliso yaka. [Puteho ili, “Cwale ni amuhela foliso yaka.”—Mu.] Wena uya swana maabani, kacenu, ni kuyakuile, Kreste. [“Wena uya swana maabani, kacenu, ni kuyakuile, Kreste.”] Cwale na Ku lumela. [“Cwale na Ku lumela.”] Aku Ni tuse kwa kusa lumela kwaka. [“Aku Ni tuse kwa kusa lumela kwaka.”] Amen. [“Amen.”]

Ni ka Mu lumba, Ni ka Mu lumba,  
Ku lumba Ngunyana ye tabezwi baezalibi;  
Mu Mu fe kanya, mina sicaba kaufela,  
Kakuli Mali a Hae atapisize masila kaufela.

<sup>225</sup> Kana ha Mu mulati nji? [Puteho ili, “Amen.”—Mu.] Halu Mu lumbekeni he. Mutu ni mutu, ni mazoho ananuzwi mwa halimu, Mu mufe milumbeko, muzwale hanza taha kwanu ku to lu lukulula.



*SICO SA MOYA MWA MWAHA WATENI* LOZ65-0718E  
(Spiritual Food In Due Season)

Liñusa le ka Muzwale William Marrion Branham, neli kutilizwe lwa pili mwa Sikuwa la Sunda manzibwana, Sikulu 18, 1965, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi ni ku hatisiwa kusina kuzusa sika mwateni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)